


WALA GINAHUKMAN SA DIOS ANG TAWO NGA DILI UNA SIYA GINAPASIDAN-AN

 “Magatawag og napulo ka libo nga mga Manolunda,” diin mahimo man laglagon sa usa ang kalibutan, “apan namatay Siya alang kanimo ug kanako.” Ingon niana ang basihanan nga gusto ko sa akong mensahe para sa Dominggo sa buntag, kon itugot sa Ginoo, ang bahin sa “Unsa man si Cristo kaniadto?” Ug karon nagapaabot kita nga basin awiton pag-usab sa niining mga batang babaye ang maong awit alang kanato, sa Dominggo sa buntag. Igsoong Wheeler, gusto ko gayud isulti nga aduna ka og duha ka maugdang nga mga gagmay’ng gining dinha, ug ang ilang binistihan, ug wala gayu’y make-up ug tanan na. Mga Cristohanon gayud silang tan-awon para kanako, ug nagaawit nga ingon niana ug nagalihok nga ingon niana. Maayo kaayo kana.

² Nagatoo ko nga sa miaging adlaw gisultihan ko ang akong asawa, nga aduna gayud kita og pundok sa limpyo-tan-awon nga mga kababayen-an dinhi. Ginapasalamatan ko kana. Ang ilang mga tag-as nga buhok ug limpyo nga mga nawong, ug ang maligdong gayud nga binistihan. Ako—ako—ginadayeg ko kamo sa matag higayon nga ako—nagaanhi ako. Miingon ako kang Meda, “Gusto ko silang tanan palinyahan diha sa usa ka higayon ug kuhaan sila og retrato aron nga akong maipakita sa ubang mga iglesia kung unsa ang atong iglesia dinhi.” Nga diin ginawali nato kini nga mga butang, ilang—ginatuman nila. Ug nalipay gayud kita. May butang nga kaayohan kini alang kanato. Nasayod kita nga sa dihang kita—aduna kita’y ginahangyo, kung ang atong kasingkasing wala magasaway kanato, nahibalo kita nga ang Dios nagadungog kanato.

³ Kaganinang buntag, ang usa ko ka higala, nga atua sa halayo gikan dinhi, ang nagbuy-od didto, dalidali siyang gikarga ug nga halos—halos wala na’y kinabuhi, gidahum nga mamatay na siya sa pipila ka minutos. Nanawag sila, pabanagbanag na kadto. Mibangon ako gikan sa higdaanan, miluhod diha sa salog, ug misugod sa pag-ampo alang niadtong tigulang nga higala ug natawag ko kadto nga espiritu pinaagi sa grasya sa Dios, ania mibalik kini pag-usab. Naulian na, nahibalik pag-usab, nakita n’yo, nga buhi sa gihapon uban nato karong gabhiona, alang sa kahimayaan sa Dios. Kana mao ang tigulang nga si Igsoong Dauch, nubenta’y-nuebe anyos na ang panuigon,

baynte—baynte-uno na ka mga tuig nga lagpas na sa panahon sa iyang paglatas sa kinabuhi. Apan ang Ginoo maayo gayud ug puno sa kalooy, busa mapasalamaton kita tungod niini.

⁴ Karon, si Igsoong Neville, nagtinan-away kami sa usa'g usa ug nahibalo ako nga aduna na lang ako og diyutay'ng . . . usa pa ka panerbisyo nga ipahigayon dinhi, ug sa Dominggo kana. Ug ako—dili ko gusto nga ilugan ang akong pastor, gusto ko lang gayud nga madungog siya nga nagawali.

⁵ Niadtong Dominggo sa gabii sa dihang siya miwali, sultihan ko kamo, nag-anhi ako dinhi sa niining gamay nga drive-in uban ang usa ka higala, aron mokaon og sandwich pagkahuman, sila Igsoong lalaking Evans ug Igsoong babayeng Evans, ug nahinagbo sila Igsoong lalaki ug Igsoong babayeng Sothman didto. Ginahisgotan nila Igsoong lalaking Sothman ug nilang tanan ang mahitungod sa maanindot kaayo nga mensahe. Ug, sultihan ko kamo, kadto ang gihunahuna ko tibuok semana, halos. Ug ang pipila sa mga nahisgotan niya mao'y kung unsa nga ang maong ostrich naghunahuna nga abi niya naitago na niya ang iyang kaugalingon. Karon, tinuod kana, sa dihang ginasuksok niya ang iyang ulo diha sa yuta, pero makita sa gihapon ang halos kinatibuk-an niya. Busa ingon niana usab ang atong ginabuhat usahay. Ginapaningkamotan natong itago ang atong ulo sa luyo sa kung unsa mang butang, sa kanunay. . . tingali makita ra sa gihapon kita, kabalo na mo. Makita Niya ang tibuok kanato, nakita n'yo. Busa mapasalamaton gayud kita niana.

⁶ Dayon nahunahunaan ko, bueno, gusto kong makig-istorya sa iglesia ug nahunahuna ko, bueno, Ako—ako . . . Kanunay man nga nagawali kaninyo si Igsoong Neville, busa pag-ania ako himoon ko gayud nga mohapit dinhi. Dili ko gusto mamahimong hipokrito, ug wala man pud ko'y adtoonon nga tawag, o unsa man, dayon nagalingkod lang didto sa balay ug abli ang simbahan dinhi. Ako—kinahanglan ako'y . . . Gusto ko nga maania dinhi tungod kay gimahal ko kamo.

⁷ Sultihan ko kamo, siguradong medyo gayud ako . . . Dili nakiuyon sa ako ang panahon dinhi, ug ako . . . ug dili nakiuyon sa ako kining lugara ug allergic gayud ako sa hangin nga ania dinhi. Sa diha nga modapat na kana nga hangin kanako magkaaduna ko og pagpangatol, dayon, kita n'yo, ug wala ka na gayu'y mahimo pa bahin niini. Ug ako . . . Ug dili gayud maayo ang among bation, ni usa kanamo, pag-ania kami dinhi. Kami . . . halos wala gayud ni usa kanamo ang maayo ang bation sukad niadtong miabot kami dinhi, tungod kay medyo naanad na gayud kami nianang hataas nga klima.

⁸ Apan, karon, ang usa ka butang nga nagapaanhi kanako dinhi mao'y kamong tanan. Husto kana, kamong tanan. Kabalo mo, makakaplag ka og daghan kaayo nga mga higala, ako—

mapasalamaton gayud ako. Siguro akong...kung ihapon ko lang, sa personal, ang mga tawo nga akong kaila, anaa sa mga minilyon na tingali kini sa tibuok kalibutan. May usa pa gani nga nagbanabana niini, ug siguro sa personal nga panagkaila, nga mga anaa na sa napulo ka milyon nga mga tawo. Apan may sa kung unsang butang sa—sa kaugalingon mong lugar, mahitungod sa pipila ka mga tawo: Aduna gayu’y...Ang tanan adunay ingon niana, aduna gayu’y espesyal nga mga tawo sa imong kinabuhi. Kabalo na mo, nagatoo ako niana. Kung wala man ugaling, nan nganong espesyal man para kanato ang atong asawa? Ug nganong—nganong ang atong...Kita n’yo? Kita...ang atong mga asawa, ang atong mga bana, ug uban pa, kini—espesyal sila. Ug aduna usab kamo og ingon niana sa mga higala mo. Aduna gayu’y daw sa unsang katalagsaon nga gusto mo gayud nga makighimamat kanila ug makig-istoryahanay kanila. Aduna gayud og medyo ingon-anang luna.

⁹ Ug madumduman ko pa kini nga kanhi kalapokan dinhi kon diin gitukod kining gamay nga iglesia, ug kon diin nga sa wala pa kini gitukod dinhi wala gayud kini gawas nga usa—usa ra ka lim-aw. Mao kana’y hinungdan nga anaa dinhang lugarang maong dalan, aron likayan kana nga lim-aw. Kini mismo ang panagiya nato, ug ang kalsada naa ra mismo paggawas mo nianang pultahan dinha. Ug, pero usa ra kini ka lim-aw kaniadto. Ug mahinumduman ko pa niadtong mianhi ako ug naningkamot nga makakaplag og usa ka lugar nga pagatukoran og usa ka iglesia alang sa Ginoo, ug usa pa lang ako ka batan-ong lalaki kaniadto.

¹⁰ Ug naminaw ako kanila, sa niining batan-ong lalaki ug sa niining usa pa dinhi, nga nagaampo dili pa lang dugay, nga may bug-os nga kadasig. Sa hunahuna ko, “Kabalo ka, nagaampo ako kaniadto nga ingon niana, nga walay hunong-hunong, halos.” Ug dayon sa nagakatigulang ka na, medyo mohinay ka na og diyutay, kabalo na mo, ug ingon niana. Nagadagan ka pa sa gihapon, pero “nakasegunda” ka na sama sa gikaingon ko na kang Igsoong Wood dinha. Apan, ug dayon samtang...Ug dayon paglabay sa mga panahon mohinay na ang imong dagan, pagmoabot na ka og mga sitenta o otsenta, sa hunahuna ko. Apan, kabalo na mo, ang...nagadagan ka pa sa gihapon, bisan pa man. Samtang makahimo ka pa sa pagdagan, unsa ma’y diperensiya niana? Medyo mas taas lang nga panahon para makaabot didto.

¹¹ Mahinumduman ko sa unsa nga nagaampo ako kaniadto, ug dinhi mismo sa niining kasagbotan, dinhi mismo kon diin nagabarug karon kining pulpito, sa lugar mismo nga gibutangan niini, dinhi ko giugbok ang gamay’ng taluktok aron mahibal-an ko kon diin igabutang ang maong pulpito. Ang Ginoong Dios ang naghatag kanako sa niining lugar. Oo, sir. Karon, dinha mismo sa batong-patukuranan nakapahimutang ang akong testimonyo bahin sa usa ka panan-awon niadtong buntaga sa dihang

gibutang ko kadto, nga halos dili ko makahunahuna niadto, nga miingon, “Dili kini ang imong tabernakulo, kondili buhaton mo ang buluhaton sa usa ka ebanghelistang,” ang giingon Niya. Milantaw ako ug akong nakita ang tibuk kalibutan niadto, ug ang mahayag nga asul nga kalangitan, ug ang mga tawo nga nagapangabot gikan sa bisan asa nga dapit; nakapahimutang kadto sa maong batong-patukuranan didto. Wala ko gayud hunahuna nga mahitabo kadto, bisan nga giingon na sa pananawon nga mamahimong ingon niana gayud; apan wala gayud kini nagakapakyas, mahitabo gayud kini bisan pa man.

¹² Nagkaaduna ako og daghang mga pagpakighinabi niining semanaha, tungod kay, niadtong Dominggo, mikunsad ang maluluy-ong Presensiya sa Ginoo. Ug milarga na unta ako niadtong Lunes.

¹³ Aduna ako’y . . . wala pa kami nakabakasyon, sa mga bata. Ayha na ako magbakasyon, sa mga katapusan na. Apan gusto ko gayud nga kuyogon ang mga bata bisan sa diyutay’ng panahon. Kinahanglan na nilang mopauli ug moeskwela na, ug busa nahunahunaan ko nga maayo gayud nga higayon kining semanaha. Moadto pa ko sa Chicago sa sunod nga semana para nianang panagtigum didto.

¹⁴ Apan tungod sa—sa pagdihog sa Espiritu, nahunahunaan ko, “Karon na ang panahon para magkaaduna og mga pagpakighinabi.” Karon na ang panahon nga ang mga niini . . . nga akong maatiman ang mga pipila kanila didto. Ug adunay . . . Makita ko ang pipila sa mga tawo nga nagalingkod dinhi karon nga atua kaniadto sa maong lawak. Nasayod gayud sila kon gihinagbo ba kami sa Ginoo o wala.

¹⁵ Pagkatalagsaong butang nga . . . ang tanan gawas sa usa ka babaye nga gipasulod ni Billy nga nauna, usa ka gining nga taga-Louisville, aduna siya’y usa ka batang babaye nga nakatambong dinhi, sa tan-aw ko miyembro sila sa Church of God sa Louisville, o morag ingon-niana. Apan sa matag panghitabo, ang matag usa kanila nga misulod, sa wala pa ako migikan sa balay gisultihan na ako sa Balaang Espiritu kon si kinsa ang maania dinhi, kon unsa ang ilang ipangutana. Ug akong gisulat diha sa usa ka papel ug gisulti kon unsa gayud ang ilang ipangutana ug bisan ang ilang mga pangutana sa kon unsang pamaagi nila ipangutana ang mga niini, ug kon unsaon pagtubag kanila. Dayon sultihan ko sila, moingon ako “Ania kon unsa gayud ang imong . . . tan-awa ha, pipila pa lang ka minutos dinhi ang milabay, unsay giingon sa Balaang Espiritu . . .” Adunay kab-oton sa lamesa ug moingon, “Kita mo? Gisulti na Niya kini kanako sa wala ka pa mianhi.” Kita n’yo? Sa diha nga atua pa ako sa balay, kon kinsa ang manganhi ug kon unsa ang mahitabo, kon unsa ang ilang mga taras, ug ang tanan na bahin niini, sa dili pa gani ko mogikan sa balay.

¹⁶ Nakita ko na ang higayon, daghang higayon na, sa dihang nagabiyahe ako sa dalan, nga nagaampo, makita ko kanang linya sa pagpaampo nga nagaagi sa akong atubangan ug mahibaloan ang matag ngalan sa mga maanaa dinha sa linya sa pagpaampo, sa dili pa ako makaabot dinhi. Husto kana. Ug mahibaloan pa gani kon asa sila manglingkod sulod sa simbahan ug kon unsa ang ilang...kon unsa ang ilang panamit ug kon unsay ilang mga hitsura. Wala mo ginasulti ang tanan ngadto sa mga tawo nga sama niana. Ikaw... May mga butang nga nagakahitabo nga wala mo lang ginasulti kanila. Dili na kinahanglan nga isulti pa kanila. Ang ginasulti ko lang sa mga tawo ang mga butang nga sa akong hunahuna makatabang kanila, pag-sugoon ako sa Ginoo nga isulti kanila, moingon, “Isulti mo kini.” Dili na nimo gusto nga isulti pa ang tanang butang nga imong nakita, tungod kay mahimong dili na kana husto, nakita n’yo, imo lang... siyempre, magkaproblema gayud ka ug tanang uban pa nga sama niana. Kinahanglan nga mahibaloan nimo kon unsaon sa pagdala nianang mga butanga pinaagi sa Espiritu sa Ginoo.

¹⁷ Adunay mga tawo nga nagtindog sa akong atubangan ug nangutana kanako og mga pangutana, nahibalo na ako, apan dili ko masulti kanila, tungod kay mabati ko nga daw sa may nagapugong kanako nga buhaton kini. Mahinumduman ninyo, siguro niadtong miaging Miyerkules sa gabii kadto, nagwali ko mahitungod sa, *Usa ka Binilanggo*. Kita n’yo? Kita n’yo, gusto nimo nga sultihan kadto nga tawo, apan May nagaingon, “Ayaw pagbuhata kana.” Nagaingon ang Espiritu, “Ayaw pagbuhata kana. Ayaw pagbuhata kana.” Bisan pa man nga makita mismo kadto sa gasa, kita n’yo. “Ayaw pagbuhata kana. Ayaw pagbuhata kana.” Kita n’yo, busa mas maayo nga dili mo gayud buhaton; kay magkaproblema ka sa Dios.

¹⁸ Karon, wala kita nanganhi karong gabhiona aron nga manindog lang dinhi. Gusto nato nga madungog ang Pulong sa Ginoo. Dugay na kamong nagaampo ug nagkaaduna kita og maayo gayud nga higayon, ug—ug ako...sa kanunay pagmoanhi ako nahibalo ko nga modala gayud ko og usa ka gamay’ng listahan sa mga teksto tungod adunay...Usahay si Igsoong Neville matugtanon kaayo nga kanunay niyang ginahangyo kanako, “Mahimo bang ikaw na ang mohimo *niini*,” o “mohimo *niana*,” o “magwali?” Ug tan-awon ko dinha hangtud nga makakita ako og teksto ko sa kung unsa man ug dayon dinha na natong sugdan kini. Ug sigurado ako...Karon, siguradohon n’yo karong Dominggo...

¹⁹ Karon, ayaw kong...Dili nato mahibaw-an, dili nato masulti. Nakita n’yo, may mga higayon nga moanhi ko dinhi nga may—may nahunahunaan na nga teksto nga akong pagahisgotan, ug pag-abot ko dinhi bug-os kining mausab. Ug aduna ako’y gipangsulat nga Mga Kasulatan, moingon ko, “Gamiton ko kini nga teksto, gamiton ko kini nga Mga

Kasulatan. Pagmahisgotan ang mga niini, igasulti ko *kini, kana* o ang *uban pa*.” Isulat ko ang, sama ang, Unang Mga Taga-Corinto 5:15, ug Ikaduhang Mga Taga-Corinto 7:1, ug Mateo 28:16, ug uban pa, ipanghan-ay sila nga sama niana, dinhi nga sama niini, ug ipangsulat kini nga Mga Kasulatan. Ug motan-aw dinha, nahibalo na ko kon unsay ginaingon sa maong mga Kasulatan; usahay dili na gani kana mahisgotan, bug-os nang mipaingon sa ubang direksyon, gayud. Ug mao nga dili gayud nato mahibaloan.

²⁰ Busa karon, kon itugot sa Ginoo, gusto ko nga maghisgot, sa pagtapos niining gamay ng sunod-sunod nga mga panerbisyo sukad niadtong ania ako dinhi, niadtong Dominggo sa buntag, sa usa ka importante kaayo nga butang. Busa, karon, panganhi mo og sayo, nga andam nga mopabilin og medyo dugay-dugay, tingali hangtud og mga alas-dos, mga ingon-niana. Ug busa kini. . . Aduna ako og mga traynta o kuwarenta ka Mga Kasulatan nga naisulat na bahin sa maong hisgotanan, apan kini siguro. . . ang ginapaninguhaan kong buhaton, kung tabangan ako sa Balaang Espiritu, mao ang paghisgot sa Mensahe ug ang dapit kon diin Kini karon, ug hinayhinay Kining hisgotan kon diin Kini mismo nagsugod, ug pagahisgotan Kini hangtud mismo niining panahona.

²¹ Busa nga kung ako—moadto na ako sa Chicago, dayon kinahanglan kong modiretso sa Arizona, ug dayon dire, dire-diretso na. Ug tingali, sa akong nasayran, tingali sa sunod tuig na usab, tingali sa sunod nga ting-init, ayha pa ako makabalik pag-usab sa taberbakulo, gawas lang kung makaagi og usab dinhi, tungod aduna usab ako dinhi og mga panagtigum.

²² Ug si Billy, sa karon, ginahikay ang paggawas ko sa nasud para sa usa ka kumpleto nga pagbiyahe sa tibuok kalibutan nga magsugod na dayon pagkahuman sa Pasko. Ug puno na gayud ako hangtud mga Disyembre, ug, bueno, tingali sa unang semana sa Disyembre, sa Dallas. Busa dayon—dayon sa Enero gusto namo nga sugdan na ang usa ka kumpleto nga pagbiyahe sa tibuok kalibutan, molibot, gayud, ug ginahikay na namo kana karon, nga ginahibalo kon asa gayud magapanguna ang Ginoo. Ug—ug ako—mapasalamaton gayud ako sa. . . bisan sa mga tawo, sa mga ministro, bisan unsa pa man ang akong isulti batok sa ilang—ilang mga denominasyon ug ingon-nianang mga butang.

²³ Kabalo mo, ang nakasulat sa libro nga nahimutang diha sa luyo karon, si Igsoong Roy Borders ang nagaasikaso sa maong mga imbitasyon, ug sukad pa niadtong Pasko, sa pagsugod sa tuig, sobra sa usa ka libo na ang mga imbitasyon gikan sa tibuok kalibutan. Usa ka libo ka mga imbitasyon ang miabot dinha. Busa kinahanglan gayud nga giyahan ako sa Ginoo kon asa sa mga niana ang pagaadtoan, ug kung unsay pagabuhaton. Nagadepende lang kita diha Kaniya. Dili mo mahimong maadtoan kana tanan. Ikaw—dili mo mahimong

adtoan ang sobra sa walo o napulo sa mga niana sulod sa usa ka ting-init kung gikinahanglan mo man, diha sa usa—usa ka kumpleto . . . gawas lang kung mopahigayon ka og usa ka gabii dinhi ug usa ka gabii didto, ug kana’y . . . nagahangyo man sila og duha ka semana ug tulo ka semana, ug uban pa, basta kono nga magpabilin gayud, o ang uban kanila moingon “sa paggiya lang sa Ginoo,” ug—ug tanan nang ingon niana, busa dili mo mahibaloan kon asa gayud ka magsugod o kon unsay pagabuhaton. Busa amo lamang ginapahiluna ang mga niini sa atubangan sa Ginoo, nagaingon, “Karon, Ikaw ang magsulti kanamo, Langitnong Amahan.” Ug tabangi ko ninyo sa pag—ampo bahin niining butanga, kita n’yo, tabangi ko ninyo sa pag—ampo nga mapahigayon namo kini.

²⁴ Ug nahunahuna ko, human nga napahigayon ang panerbisyo sa pagpang—ayo niadtong miaging Dominggo, kung ingon—ana tingali karong Dominggo kung makapanudlo kita ug hisgotan kini mismo ug ipakita kung unsa—unsa na nga panahon kita . . . kon asa na kita, kung unsa—kung unsay—kung unsay—kung unsa ang—ang tulo—ka—pilo nga katuyoan sa dakung plano sa Dios sukad kaniadtong wala pa ang pagkatukod sa kalibutan, ug dalhon kini hangtud sa niining panahon karon, ang tulo—ka—pilo nga plano sa Dios, ang maong plano. Ginahan—ay ko na ang ikaduha nga bahin niini karon, ginakuha ang Mga Kasulatan, ug ginapangita ang mga niini ug ginaplastar ang mga niini.

Karon, atong tan—awon, atong iduko sa makadiyut ang atong mga ulo.

²⁵ Ginoong Jesus, ang dakung Magbalantay sa toril sa mga carnero, nagkatigum kami dinhi karong gabhiona sa Imong grasya, balaan nga Ngalan. Kami nahigugma Kanimo, Ginoo, ug kami nagapasalamat Kanimo alang niining gabhiona sa panagtigum sa pag—ampo, alang sa mga kalantahon sa iglesia samtang nga ginaawit namo kini nga may kalipay sa among mga kasingkasing, ug—ug madungog kini samtang nagapangabot sila, nga ginapakpak ang mga kamot. Ug dayon nanagluhod kami ug gibubo ang tanan namong mga kasingkasing nganha Kanimo, ug nagpasalamat Kanimo alang sa Imong mga gihimo para kanamo, ug—ug nagahangyo Kanimo nga padayon Mo kaming ubanan sa paglakaw.

²⁶ Ug karon miabot na ang takna alang sa pagbasa sa Pulong ug alang sa usa ka butang nga pagahisgotan, nganha sa mga tawo. Giyahe kami sa among mga panghunahuna, Amahan, ug angkuna ang himaya. Ug mamulong Ka karong gabhiona, nganhi kanamo, nga makatabang kanamong tanan nga magapanggawas dinhi nga dala ang katuyoan sa among mga kasingkasing nga magkinabuhi og labi pang maayo ug nga mas mahiduol pa Kanimo kay sa kaniadto. Mao kana ang katuyoan nga ania kami, Ginoo, ania kami sa pag—ila pa’g dugang bahin Kanimo. Ug nagaampo kami nga igapadayag Mo

ang halangdon Mong Persona kanamo karong gabhiona diha sa kapadayagan sa Imong Pulong, aron kami masayod kon unsaon nga mahimong usa—usa ka mas maayo nga mga Cristohanon ug kung unsaon sa pagpanglihok sa niining kaulahiing mga adlaw. Ginapangamuyo namo kini sa Ngalan ni Jesus. Amen.

²⁷ Karon, midirekta ang akong panan-aw sa usa ka teksto dinhi sa Isaias, Isaias 38. Basahon nato dinhi sa Isaias, Isaias 38.

Niadtong mga adlawa si Ezechias nasakit nga ikamatay. Ug si Isaias ang propeta ang anak nga lalaki ni Amos miadto kaniya, ug miingon kaniya, Mao kini ang giingon sa GINOO, Husaya ang imong balay: kay ikaw mamatay, ug dili mabuhi.

Unya giatubang ni Ezechias ang iyang nawong ngadto sa bongbong, ug miampo sa GINOO.

Ug miingon, Hinumdumi ako, Oh GINOO, ako nagapangamuyo kanimo, kung giunsa ko ang paglakaw sa imong atubangan sa kamatuoran ug uban ang usa ka hingpit nga kasingkasing, ug nakabuhat nianang maayo sa imong mga mata. Ug si Eze- . . . si Ezechias mihilak sa hilabihan gayud.

Unya miabut ang pulong sa GINOO kang Isaias, nga nagaingon,

Lakaw, ug ingna si Ezechias, Mao kini ang giingon sa GINOO, ang Dios ni David nga imong amahan, nadungog ko ang imong pag-ampo, nakita ko ang imong mga luha: ania karon, dugangan ko ang imong mga adlaw napulo ug lima ka tuig.

²⁸ Hinaut nga idugang sa Ginoo ang Iyang mga pagpanalangin sa niining pagbasa. Usa kini sa pinakamaanindot nga hilisgotanan para sa usa ka hamubo nga mensahe dinhi, sa tan-aw ko. Gusto ko nga pagaulohan kini nga: *Wala Ginahukman Sa Dios Ang Tawo Nga Dili Una Siya Ginapasidan-an*. Ug kita—kita—kinahanglan nato nga masabtan ang—ang basihanan o ang programa niini dinhi, sa niini nga teksto karong gabhiona, ginapasidan-an sa Dios ang tawo sa dili pa siya dal-on ngadto sa iyang kamatayon.

²⁹ Karon, aduna niini ang matag usa. Mahimong moingon kita, “Aba, *kini* nga tawo namatay nga wala man lang napasidan-an.” Dili, dili, dili. Ang Dios dili gayud. . . Wala kamo nasayod kon unsa ang anaa sa sulod sa kasingkasing niana nga tawo, wala kamo nasayod kon unsay nangahitabo sa iyang kinabuhi. Kita n’yo? Wala gayud ang Dios nagahatud ni bisan kinsa nga tawo ngadto sa iyang kamatayon nga dili una siya ginapasidan-an bahin niini, nga ginasultihan siya, butang nga, usa ka pagpangandam. Ang Dios mao’y—mao’y labing gamhanan, ug Siya—nagapanuktok Siya sa kasingkasing sa matag tawo, ginahatagan kini og kahigayonan nga makaduol. Karon, tingali

og gipasidan-an na ang tawo ug gisalikway niya Kini, ug—ug ilingolingo lang ang iyang ulo Niini ug molakaw palayo, moingon, “Ah, kataw-anan ra kini nga pagbati, mawala ra kini kanako.” Apan, bisan pa man, ang Dios kadto, ang Dios kadto nga nagpakig-istorya kaniya.

³⁰ Ug wala sukad ang Dios nagahatud og paghukom ngadto sa kalibutan nga dili una ginahatagan ang mga tawo og pagpasidaan. Wala gayud ang Dios nagabuhat og bisan unsa nga dili una ginapahayag kon unsay Iyang pagabuhaton. Ug ginahatagan Niya ang tawo og pagpili, ug mahimo mo—mahimo mong buhaton ang husto o sayup. Mao kana ang Iyang... Kita n’yo, dili gayud mahimong usabon sa Dios ang Iyang—Iyang kinaiyahan. Dili Niya gayud mahimong usabon ang Iyang programa gikan sa kon unsay nasugdan na Niya, tungod kay Siya wala’y-kinutuban ug ang Iyang programa ug ang Iyang mga ideya hingpit gayud. Busa, kung usabon Niya Kini, magapakita kana nga nadugangan pa ang Iyang kahibalo. Busa, ingon nga Siya wala’y-kinutuban, dili na mahimong madugangan pa ang Iyang kahibalo. Ang Iyang—ang Iyang unang—ang Iyang unang desisyon kanunay gayud nga hingpit, ug wala na gayud ang makapausab pa Niini. Kita n’yo?

³¹ Ang Dios, sa wala pa ang tawo... nagkaaduna og kahigayonan nga mobuhat og sayup, gibutang na siya sa Dios sa basihanon kon diin puede siyang modawat o mobalibad, makahimo siya sa pagdawat o—o dili.

³² Ay, lain pa’y ako, kung ania kana nga ministro, si Igsoong Baker, nagtoo ko nga atua siya didto sa—sa mga pagpakighinabi niadtong miaging adlaw, ania na kanako ang iyang mga pangutana nga gisulat niya para sa ako mahitungod sa binhi sa serpente. Ania na kini kanako karon. Kung ania man siya dinhi, aba, bueno... Dili ko siya makita kon asa man siya dapit karon. Apan ania na kini dinhi. Siya ug ang iyang asawa, usa ka maayo kaayo nga lalaki ug—ug babaye, apan sila—wala sila makasabot sa pipila ka mga butang mahitungod sa pagtudlo sa binhi sa serpente, kung giunsa nga—nga... may pipila ka mga pangutana bahin sa akong gisulti, ug—ug mga wali gawas pa niadto, ug—ug ang paghisgot mahitungod sa—sa pagmabdos ug uban pa. Apan ako... dayon ingon niini lang ang maong igsoong lalaki, usa ka maayong lalaki, usa ka Cristohanon mga pila pa lang ka tuig o duha, apan wala lang gayud nakasabot, nakita n’yo.

³³ Malisud kini kung dili ninyo... Kinahanglan nga nakadepende kamo diha sa Espiritu Santo tungod kay kini nga Biblia nahisulat sa mga talinghaga. Dili ka puedeng basta na lang molingkod ug basahon Kini nga sama sa usa ka mantalaan. Gililong Kini. Oo, sir. Unsaon man ninyo pagpangatarungan para sa Dios sa dihang gisulti Niya kaniadto kang Moises didto, miingon, “Karon, dili ka magbuhat og bisan unsa man nga linilok nga mga larawan,” diha sa Iyang mga kasugoan, “dili

ka gayud magbuhat og bisan unsa man nga sama sa Langit, bisan unsa—bisan unsa man nga sama sa Manolunda, o bisan unsa pa man, dili ka gayud magbuhat og bisan unsa man nga linilok nga mga larawan,” pero niadtong adlaw usab gisultihan siya nga maghulma og duha ka mga Manolunda gikan sa tumbaga ug ibutang ang mga niini didto mismo sa lingkuranan sa kalooy, kon diin atua ang kalooy? Kita n’yo? Kinahanglan ninyo nga maila ang Dios ug ang Iyang Kinaiyahan ayha ninyo masabtan ang Iyahan Pulong. Siya—Siya—anaa Kaniya ang yawi nianang Pulong, Siya Mismo, ug Siya—Siya lamang ang Usa nga makahimo—makahimo sa pagkupot Niini, ug sa pag-abli Niini, ug busa Siya Lamang ang angay’ng magpadayag Niini.

³⁴ Ug karon, nahibaloan nato nga ang Iyang Kinaiyahan dinhi, maoy, kanunay’ng ginapasidan-an ang tawo sa dili pa ang paghukom, ginapasidan-an ang usa ka nasud sa dili pa ang paghukom, ug uban pa. Kanunay Siya nga nagahatag sa Iyang pagpasidaan, usa ka pagpahinumdom kanato, bahin sa usa ka katungdanan. Aduna kita’y tulubagon, ug gibutang kita sa Dios dinhi ibabaw sa yuta alang sa usa ka katuyoan, ug kana nga katuyoan mao ang hinungdan nga gibutang Niya kita dinhi, aduna kita’y tulubagon Kaniya tungod sa niana nga katuyoan. Kinahanglan nga adtoon ninyo Siya ug hibaloan kung unsay gusto Niyang ipabuhat kaninyo. Kita n’yo? Kung dili ninyo . . .

³⁵ Kung miadto ka aron magtrabaho para sa usa ka tawo, ug gihatagan ka niya og trabaho sa usa ka ransohan, o kung unsa man, ug miadto ka lang didto sa kamalig ug milingkod lamang didto, ug moingon, “Bueno?” Kita n’yo, kinahanglan nga adtoon mo ug pangutan-on siya kung unsay gusto niyang ipabuhat kanimo, ug dayon buhata kana. Kung nagapanarbaho ka sa usa ka tawo, hibaloan mo kung unsa ang mga katungdanan mo.

³⁶ Ug dayon kung ang atong kinabuhi ania dinhi sa—sa yuta, kung ingon-ana kinahanglan nato nga moduol ngadto sa Usa Nga maoy nagbutang kanato dinhi, ug, “Ginoo, unsa may buut Mong ipabuhat kanako? Unsa—unsa—unsa ma’y angay kong pagabuhaton? Nganong ania man ko dinhi?” Kon kini para mahimong usa ka asawa, tighugas og plato, kon kini para mahimong . . .Bisan unsa man ang gusto sa Dios nga ipabuhat kaninyo, nan buhata ninyo kana sa labing maayo nga inyong nahibaloan kon unsaon sa pagbuhat niini. Bisan unsa pa man kagamay, bisan unsa man kagamay kini, kinahanglan ninyo kining buhaton.

³⁷ Moingon mo, “Bueno . . .” Ang problema niini, mao’y, gusto sa matag usa kanato nga buhaton ang trabaho sa ubang tawo. Gusto natong tanan nga dalhon ang bola, sama sa giingon nato, nakita n’yo.

³⁸ Sama niining orasan dinhi, karon, ang matag gamay'ng paglihok niini adunay puwesto dinha. Karon, dili puede nga mahimong mga kamot ang matag bahin niini. Karon, ang mga kamot lang niini ang ginatan-aw ko aron makita kung unsa na'y oras. Apan kon wala sa puwesto ang usa sa gamay'ng mga engranahe dinha sa sulod, dili na niini mapapabilin ang hustong oras.

³⁹ Ug ingon niana usab sa mga tawo. Kitang tanan, ang Lawas ni Cristo, kinahanglan nga maanaa diha sa ilang puwesto, nga managkauyon. Kita n'yo? Ug dayon mahimo natong lantawon ang palibot ug makita kon unsa na nga oras sa adlaw kini. Kita n'yo? Dayon nagalantaw ang kalibutan aron nga makita kon unsa kini. Kita n'yo? Kita n'yo? Nagapaniid sila kaninyo. Ug kung ikaw usa ra ka gamay'ng pino nga kuwerdas sa relo, pinakapunoan man nga kuwerdas sa relo, o unsa ka man, buhaton mo ang pinakamaayo nga trabaho nga mamahimo mo niana.

⁴⁰ Karon, tungod kay, aduna man kita'y katungdanan nga kinahanglan natong panubagon ngadto sa Dios sa umalabot nga adlaw. Ang matag tawo nga miabot sa ibabaw sa yuta kinahanglan nga manubag ngadto sa Dios alang sa usa ka katungdanan. Ug, ngadto sa kadaghanan kanato, usa kini ka pagkapiniyalan, nga kinahanglan kita manubag. Kita...Kini nga katungdanan usa ka pagkapiniyalan nga gikatugyan sa Dios kanato, dili ko igsapayan kung unsa man kini. Sama sa ako nang giingon dili pa lang dugay, "usa ka asawa," nan magmatinuuron nga usa ka asawa. Husto kana. Kung piniyalan ka man nga mamahimong usa ka mag-uuma, magmatinuuron nga usa ka mag-uuma. Bisan unsa man kini nga gitugyan sa Dios kanimo nga imong pagabuhaton, nga aduna ka'y pagkapiniyalan diha niana, tulubagon mo gayud kini sa Dios, tungod gikinahanglan man ang tanan niini nga mga butang aron nga mapahigayon kini.

⁴¹ Gisultihan si Ezechias kaniadto nga mohimo og mga pagpangandam ug mangandam na tungod kay gikinahanglan na niya nga tagboon ang iyang Magbubuhat. Karon, usa ka hari si Ezechias, ug usa—usa ka bantugan nga tawo. Nahimatikdan ba ninyo ang iyang hangyo dinhi? "Ginoo, nagapangamuyo ako Kanimo nga Imo akong pagahunahunaon. Ako—milakaw ako sa Imong atubangan nga hingpit ang kasingkasing." Pagkamaanindot kadto nga testimonyo alang—alang—alang kanato karon, ug kinahanglan nga ingon niana gayud, ang usa ka tawo nga nagalakaw sa atubangan sa Dios.

⁴² Bisan gipahamtang na ang kamatayon ngadto sa maong tawo ug sa gihapon giusab sa Dios ang Iyang hunahuna mahitungod kaniya, tungod kay aduna pa ma'y gustong buhaton si Ezechias ug miingon man ang Dios nga Iyang "igahatag ang mga tinguha sa atong kasingkasing." Ug miabot na ang takna ni Ezechias,

ug siya—nagkaaduna siya og kanser, o unsa man, ug—ug ila kining gihinganlan nga “usa ka hubag” niadtong panahona, apan nasayod kita nga sa kasagaran dili ka man mamatay sa mga hubag, basta na lang mangaayo ang mga niini. Apan tingali usa kadto ka kanser, ug migawas kadto nga sama sa usa ka hubag. Ug—ug miingon ang Dios kang Isaias, miingon, “Umadto ka ug isulti kaniya nga mamatay na siya.” Ug aduna pa’y butang kaniadto nga gustong pagabuhaton ni Ezechias. Aduna siya’y—aduna siya’y. . .

⁴³ Pagmohangyo gani ka og bisan unsa man sa Dios, kinahanglan nga aduna ka og hinungdan para niini. Sama lang kini sa niining Kasulatan nga kanunay kong ginahisgotan, “Kung magaingon ka niining bukid, ‘Pahawa,’ ug dili magduhaduha, kondili toohan nga kung unsa ma’y imong giingon mamatuman, maangkon mo kung unsay imong giingon.” Karon, ang tanan niana nakadepende sa motibo ug katuyoan, kita n’yo, o dili kini mamatuman. Kita n’yo?

⁴⁴ Dili ka na lang basta moanhi dinhi. . . Dinha kon diin ang daghan kanato nagakasayup, manganhi ug miingon, “Karon, ipakita ko kaninyo nga aduna ako’y pagtoo aron mahimo kini.” Karon, sayup ka na sa sugod pa lang. Wala ang Dios nagahatag og mga gasa aron lang dula-dulaan kini.

⁴⁵ Sa gikaingon ko na kaganina, wala Siya nagapakita kanimo og mga panan-awon aron lang duladulaan. Dili kana butang nga pagadula-dulaan. Sagrado kana. Gamita lamang kini sa. . . sumala sa pagpahanugot kanimo sa Ginoo. Magmahimong usa ka binilanggo diha Kaniya. Bisin kung unsaon mo pa kagustong sultihan kadtong lalaki nga sayup siya, ug kung unsa kini, kana, o uban pa, magpabilin ka lang nga hilom hangtud nga ginaingon na sa Dios. Dayon pagginaingon na sa Dios, nan mahimo ka nang moadto uban ang MAO KINI ANG GINAINGON SA GINOO! Hangtud nga ingon niana, hikalimti na lang ang mahitungod niini.

⁴⁶ Ang—ang kalibutan sa karon sama ra usab kang Ezechias kaniadto, gipasidan-an na kini. Kanunay kining ginapasidan-an. Gipasidan-an na ang iglesia. Ug, karon, kini nga mga butang wala nagakahitabo tungod—tungod lang nga nasalagmaan. Ang tanan niini may sa kung unsang butang sa luyo niini.

⁴⁷ Karon, si Ezechias, nga nagmasakiton, nagkaaduna niining hubag, dili kadto tungod kay nasalagmaan lang. Gipadala sa Dios si Isaias didto ug nagsulti kaniya nga husayon na ang iyang balay karon tungod kay mamatay na siya. Ug mihilak si Ezechias, ug misulti sa Dios, “naglakaw ako sa Imong atubangan nga hingpit ang kasingkasing ug ako—nagaampo ako Kanimo nga lugwayan pa ang akong kinabuhi alang sa usa ka katuyoan, usa ka maayong katuyoan, ang katuyoan sa Dios.”

Giingnan sa Dios ang propeta, miingon, “Balik ngadto ug suginli siya.”

48 Karon dili ba talagsaon kana? Si Ezechias mao kaniadto ang pinakabantugan nga tawo sa yuta. Kita n’yo? Usa ka hari si Ezechias, ug usa ka diosnon nga tawo. Usa siya ka tawong matinuuron, kung naipangamuyo niya kadto sa atubangan sa Dios ug wala siya gibadlong sa Dios niini, “Milakaw ako sa Imong atubangan uban ang usa ka hingpit nga kasingkasing.” Karon daku kaayong butang ang ginapakaingon niana. Kita n’yo?

49 Ug wala gayud miingon ang Dios, “Dili, Ezechias, wala mo kadto buhata,” kondili gi-admitar Niya nga gibuhat gayud niini kadto. Ug miingon Siya, “Akong—akong pagalugwayan pa og diyutay ang imong kinabuhi.” Kita n’yo? “Ihatag Ko kanimo ang imong hangyo,” kita n’yo, tungod kay dugay na siyang matarung nga tawo, dugay na siyang usa—usa ka tinuod nga alagad ngadto kang Cristo.

50 Ug dayon atong mabati nga may katungod kita nga mohangyo og usa ka butang kung—kung husto ang atong katuyoan, ug maingon man ang motibo nato niini.

51 Karon, makita nato karon nga sa milabay’ng pipila ka mga tuig, maingon ko nga sa milabay’ng kinse, hangtud sa daghan pang mga tuig, nga kanunay aduna gayud og pagpasidaan sa tibuok nasud, “Paghinulsol, o mangalaglag kamo!”

52 Himatikdi ninyo, nagpakig-estorya ako karong adlawa sa akong asawa kaganinang sayo sa buntag, ug ako... sayo sa pamahaw, nagalingkod kami kaganina nga nag-estoryahanay sa may lamesa sa wala pa ako milakaw. Ug miingon ko, “Asawa ko...” Nagahisgot siya mahitungod kang Billy Graham, ug mahitungod sa asawa niini, nga daw sa unsa lang ka ordinaryo ug tanan na nga pagpaningkamot nila sa pagkinabuhi. Ingon ko, “Ingon-niana ang usa ka tinuod nga alagad sa diha nga nagapaningkamot siya nga dili... sa dihang siya... makahimo tingali ang maong tawo og duha o tulo ka milyon sa usa ka tuig gikan sa iyang mga buluhaton, apan dili siya ang nagadawat niini, ang iyang foundation ang nagakuha niini, ginabalik kini ngadto sa mga buluhaton ug sa pagsibya nga mga programa, ug uban pa. Ug ang madawat ni Billy mga baynte-singko mil matag tuig.”

53 Miingon siya, “Unsaon kaha niya sa paggastos ang baynte-singko mil matag tuig?”

54 Ingon ko, “Siya—ginakuha niya kon unsa lang ang gikinahanglan niyang kuhaon, kana lang. Aduna siya og balay nga gikinahanglan niyang bayaran, ug tanan na.” Mipadayon ako, ug miingon ko, “Daku kaayo akong respeto kang Billy Graham,” miingon ko, “tungod nga aduna siya’y usa ka mensahe, ug kana nga mensahe mao ang paghinulsol.”

55 Ug dayon, sultihan ko kamo, wala na ako’y nailhan pa, nga anaa sa kayutaan karon, nga gigamit sa Dios sa niana nga mensahe nga sama ni Billy Graham. Oh, batid kaayo siya, ug motindog lang siya didto ug, buot kong ipasabot, tawgon niya kadtong mga pulitiko ug mga miyembro sa iglesia ngadto sa paghinulsol. Apan kutob lang siya niana.

56 Ug ania si Igsoong Oral Roberts, ang usa pa ka bantugan nga alagad sa Ginoo. Ug wala na’y mangahas didto ug mahimong ikumpara kang Oral Roberts. Kanang nag-ala-bulldog nga takmag sa—sa pagpalayas sa dautang mga espiritu ug ang pagtawag sa Ngalan sa Ginoo ug—ug ang diyutay’ng mga sensasyon, ug kon unsa pa, mahitungod sa Balaanong pagpang-ayo. Husto gayud kana. Kana’y usa ka mensahero sa Pentecostes.

57 Kana’y usa ka mensahero ngadto sa kalibutan sa mga denominasyonhong iglesia, kita n’yo, ug ngadto sa nagbugnaw nga kalibutan.

58 Ug dayon lantawa ang atong kaugalingong gamay og ubos nga ministerio, nagapamatuud nga “Si Jesus Cristo ang mao sa gihapon kagahapon, karon, ug hangtud sa kahangturan,” nakita n’yo. Unsa ma’y ginabuhat niana? Ginatawag kanang panon sa Pangasaw-onon, nakita n’yo. Kita n’yo? Kita n’yo, kini—nagapanawag kini gikan nianang duha ka mga grupo. Ang pagkuha kini sa Ligid gikan sa maong ligid. Nasabtan ba ninyo kon unsay buot kong ipasabot?

59 Ug dayon nagpamatuod ang Dios sa nianang mensahe nga ginawali ni Billy Graham. Ginaayo sa Dios ang mga masakiton pinaagi sa mga pag-ampo ni Oral Roberts. Ug ginahimo sa Dios ang mga butang nga si Jesus. . . ginapamatuod-an nga si Jesus Cristo mao sa gihapon kagahapon, karon, ug hangtud sa kahangturan. Ug ginatawag niini kadtong mga butang nga. . . Mga mensahe kini alang sa niining panahon. Ug ang matag usa nianang mga mensahe nagapanawag, “Paghinulsol, o mangalaglag kamo!” Husto kana. “Paghinulsol, o mangalaglag kamo!” Wala na’y paglaum pa, wala na gayud. Gipasidan-an na ang kalibutan mahitungod sa Iyang Pag-abot. Nagapakigsulti ang matag usa nianang mga mensahe ug nagapasidaan mahitungod sa Pag-abot ni Ginoong Jesus, ngadto sa duha ka iglesia nga denominational. . .

60 Hinumdomi, ang Dios kanunay gayud diha sa tulo. Sama sa Amahan, Anak, ug Espiritu Santo; ug ang pagpamatarung, ug ang bau- . . . ug ang pagpakabalaan, bautismo sa Espiritu Santo; ug uban pa; Siya diha sa tulo.

61 Karon, ang Dios anaa nianang mensahe sa paghinulsol ngadto sa iglesia nga sa ngalan lang. Diha ang Dios nianang mensahe sa Balaanong pagpang-ayo alang sa Pentecostal nga iglesia. Diha ang Dios sa Mensahe alang sa Pangasaw-onon. Kita

n'yo? Busa atong mahibaloan nga kining tanan nagapanawag, ang usa ngadto *niini*, kini ngadto *niana*, ug kana ngadto *niana*. Ginatawag sa Dios ang iglesia pagawas sa kalibutan; ang... ginatawag ang iglesia nga anaa sa denominal nga iglesia paadto sa Pentecostal; ug ginatawag usab ang Pangasaw-onon pagawas sa Pentecostal. Kita n'yo?

⁶² Sama kang Luther, Wesley, ug sa karon. Kita n'yo, hingpit gayud nga natipo kining tanan ug wala'y sayup mahitungod niini. Nasangko ko na ang tanan nga utlanan niini, ug ang mga kilid-kilid niini, ug ang sulod ug gawas niini, ug naipakita na kini pinaagi sa Kasulatan, ang pagkahan-ay niini, hangtud nga hingsayran nato kini nga walay pagduhaduha nga Kamatuoran gayud. Kita n'yo? Wala'y sayup. Nagalaum ako nga sa Dominggo bug-os kini ipatuhop sa Dios nga dili na ninyo mahimo pa nga motipas gikan niini. Kita n'yo?

⁶³ Karon, nagahatag og pasidaan ang Dios, "Pangandam alang sa usa ka paghukom." Anaa na sa mga silonganan sa eroplano ang mga bomba atomika, andam na ang tanan. Ug ang Dios, sa dili pa Niya tugotang mahitabo kining mga butanga, nagapanawag gayud Siya, sama sa Iyang gihimo kaniadto sa Sodoma, "Panggula kamo gikan niini. Pangandam kamo. Aduna gayu'y butang nga mahitabo."

⁶⁴ Sama kaniadto sa mga adlaw ni Noe, sa wala pa gipadala sa Dios ang mga tubig aron lumsan ang kalibutan niadtong dakung panahon sa wala pa ang paglunop sa kalibutan nga nagpatuyang na sa pagpakasala, ingon nga gisulti na ni Jesus sa tin-aw nga usa kadto ka adlaw nga susama gayud niini. "Maingon sa nahitabo kaniadto sa mga adlaw ni Noe, maingon man usab sa pag-abot sa Anak sa tawo." Daw sa unsa nga ang mga kababayen-an nanagpatuyang na, ug—ug nanagpangasawa ug nanagpamana, ug—ug ang dagkung siyentipikong mga kalampusan, ug ang maalamon nga mga edukado nga gikahiligan na ang intelektuwal nga bahin, ug ang gamay'ng mapaubsanon nga Panon nagalingkod lang dinha sa usa ka daplin nga nagahulat sa haduol na nga paghukom ug sa paglingkawas. Ug sa wala pa gipadala sa Dios ang kadtong paghukom, nagpadala Siya og usa ka propeta.

⁶⁵ Sama lang sa gihimo Niya kaniadto kang Ezechias, miingon Siya, "Pangandam na, kay andam na nga ipahamtang ang mga paghukom."

⁶⁶ Ug iyang gipaandam ang mga tawo alang sa maong takna. Gipaandam ni Noe ang mga tawo, ug usa kadto ka pagtawag og kalooy sa wala pa ang pahukom.

⁶⁷ Gipahibalo na ang Ninive kaniadto sa wala pa ang ilang oras. Milantaw ang Dios ngadto sa Ninive, ug miingon Siya, "Ako—kasukaon na Ako ug gikapuyan sa niining mga butang." Ako—ako—nasabtan ko nga—nga ang... bisan na ang bantugan, nga

paganong, kalibutan sa Gentil . . . Ang ilang siyudad, maingon man usab sa nahitabo kaniadto sa ilang mga adlaw, ginahukman nila sila kaniadto pinaagi og siyudad; karon pinaagi na kini og mga nasud, karon human nga mikaylap na ang populasyon sa ingon niadto nga paagi. Miingon Siya, “Kanang bantugang siyudad nagpatuyang na, ang kinatibuk-an na gayud niini, ngadto sa kasal-anan.”

⁶⁸ Ug ang Dios, sa dili pa Siya magpadala og paghukom, nagpadala gayud Siya og usa ka mensahe nga pasidaan, “Panggula kamo gikan niini! Magminatarung kamo!” Bantayi, wala gayud ang propeta nagsulti og bisan unsa kondili—kondili ang . . . Miingon, “Pagalaglagon kini nga siyudad sulod sa kuwarenta ka adlaw.”

⁶⁹ Ug, oh, kung unsa nga usahay malisud gayud buhaton ang ingon-anang mga butang, nga sultihan ang mga tawo. Kung dili magbantay ang propeta, magka-problema gayud siya, tungod mahimong mopadulong siya ngadto sa usa ka bahin, sa pagsulay nga ipagaan kini, o mopakig-kompromiso og diyutay dinhi ug diyutay usab didto. Apan ang tinuod nga propeta nga adunay sugo gikan sa Dios, dili gayud ikompromiso ang bisan unsa man, kinahanglan nga bug-os niya gayud kining maipahimutang sa linya.

⁷⁰ Kana ang hinungdan nga Iya gayud gigamit ang espiritu ni Elias, kita n’yo, tungod kay ginatuman kanunay nianang espiritu ang Iyang mga sugo. Nakita n’yo? Kita n’yo, ginapahigayon niini ang Iyang mga sugo sa eksakto gayud kung unsa Kini, ug kini kanunay ang “Mangbalik kamo sa Pulong!” Kita n’yo? Kanunay’ng usa ka pagpahibalik kanila ngadto sa Pulong.

⁷¹ Karon, nahibaloan nato ang Ninive nga anaa sa kasal-anan. Ug nagpanuko ang maong propeta tungod nga usa kadto ka kalibutan sa mga Gentil, kita n’yo, usa kadto ka Gentil nga nasud, mga tawong Gentil; dili iyang kaliwatan, dili kadto mga Hebreohanon. Mga Gentil kadto sila. May dagkung barko, pangkomersyo nga dunggoanan ang Ninive kaniadto, atua didto ang dagku nga pangabuhian sa pagpangisda, nagapangisda ang mga tawo. Ug—ug sila—aduna sila’y . . . siguro aduna sila og hilabihan ka makasasala nga nasud didto. Kuwartahan; ug—ug kon diin nga abunda ang salapi, ug ang mga tawo nahilig sa kung unsa ang opinyon sa kadaghanan niadtong panahona, kanunay nga nagasulod ang sala, ug mga paglapas.

⁷² Gikapoyan na ang Dios niini. Busa nagbutang Siya og usa ka propeta sa yuta, mao nga miingon Siya sa Iyang propeta, “Umadto ka didto sa Ninive ug isinggit, ug isulti, ‘Pagalaglagon na ang siyudad sulod sa kuwarenta ka adlaw.’”

⁷³ Karon, nahunahuna ni Jonas karon, “Kabalo ka, basin makasulod ako sa gamay’ng problema.” Busa gusto niya nga makasigurado gayud, mao nga nahunahuna niya nga

magbakasyon og diyutay ug—ug moadto sa Tarsis. Ug nahibaloan nato nga ang . . . aduna na lamang kaniadto nahibilin nga kuwarenta ka adlaw. Kita n'yo?

⁷⁴ Mao nga dinalian ang Mensahe, ang panahon haduol na. Ayaw na'g magkapuliki pa sa ubang mga butang ug mokuha pa og titulo sa Bachelor of Art ug hibaloan ang unsa mang butang. Haduol na gayud ang takna! Kana ang problema sa mga tawo sa karon, nagapaningkamot pa kita nga magtukod og dagkung mga eskwelahan ug magkaaduna og dagkung mga butang sama niana. Sa diha nga ang kalooy . . . Sus! Kon atong iwali ang Pag-abot sa Ginoo, unsa pa'y kinahanglanon nato sa mga eskwelahan? Kinahanglan natong maghinulsol ngadto sa Dios! Kita n'yo?

⁷⁵ Sama sa giingon kaniadto ni Hudson Taylor sa usa ka batan-ong misyonaryo, miingon siya . . . O, usa ka batan-ong Intsik nga lalaki ang miduol kaniya, miingon kini, "Mr. Taylor," miingon, "gipuno ako ni Ginoong Jesus sa Iyang Espiritu." Miingon, "Ako—malipayon kaayo ako!" Miingon, "Kinahanglan ko na ba'g mogahin og napulo ka tuig karon ug mokuha na sa akong mga digri ug uban pa?"

⁷⁶ Miingon siya, "Dong, ayaw na paghulat nga magkaaduna ka pa og mga digri. Kon nadagkotan na ang kandila, lumakaw ka og isangyaw Kini! Lumakaw ka og isangyaw Kini. Ayaw na paghulat nga magkaaduna ka pa og mga digri. Ayaw na, mamahimo ka na lang nga upos nga wala pa makahuman, para sa mga digri mo."

⁷⁷ Atong, pagnadagkotan na kini, kung wala ka'y laing nahibaloan, isulti lang kon giunsa nga nadagkotan kini. Ug basta—ayaw gayud sulaying kuhaon ang puwesto ni bisan kinsa man, o puwesto sa kung unsa pa. Kon nahibaloan mo na kini, isulti lang nimo kon unsa ang nahibaloan mo nga Kamatuoran, "Sa ingon niining paagi Kini miabot kanako, ug ingon niini ang nabati ko bahin Niini." Mao kana . . . Kon wala ka na'y hingsayran nga labaw pa niana, isulti mo kana! Mangadto na ta! Dinalian ang Mensahe, haduol na ang panahon.

⁷⁸ Karon, unsa kaha kon misulti si Isaias, "Bueno, maghulat ako karon ug tan-awon kon unsa ang mahitabo kaniya sa nianang hubag, una, kabalo mo. Tan-awon kon unsaon—unsanon kini . . .?"

⁷⁹ Kita n'yo, giingnan siya sa Dios, "Umadto ka didto ug isugilon kaniya, karon mismo!" Kita n'yo?

Ug giingnan Niya si Jonas nga moadto. Oh, sus!

⁸⁰ Ug sa dihang didto na siya niadtong kadagatan ug niadtong halawom nga dagat, ug—ug nadautan ang barko gumikan sa bagyo, ug gipataas na nila ang layag ug dayon mituyok-tuyok kini, nangahibulong sila kon unsa ba ang nahitabo. Apan dili nila masabtan kon unsa, daw sa dili na kadto makaabante ang

barko tungod nga nasudlan og daghang tubig. Ug—ug nanawag na ang matag tawo sa ilang mga diosdios, ug mahibaloan mo na lang. . . Atua sa iyang bakasyon kaniadto si Jonas, busa nahunahuna niyang maayo pa kono nga matulog siya, ug siguro nag-adto siya sa may bungbong sa barko, ug mihigda siyang nakataas pa ang ang iyang mga tiil, natulog. Ug adunay miingon, “Pagmata, Oh tapulan, ug tawga ang Dios mo!” Ug nasayran ni Jonas kon unsa ang problema.

Mao nga nahibalo ang matag tawo kon unsay problema karon! Kita n’yo?

⁸¹ Ug miingon siya, “Sala ko kining tanan. Kuhaa ninyo ako ug highti ang akong mga kamot, ug itambog ninyo ako sa dagat, ug dayon moundang na ang kining unos.” Ug sila may pagkadiosnong grupo sa mga kalalaken—an ug dili nila gusto nga buhaton kadto, apan hingkaplagan nila nga siya usa ka propeta ug nahibalo kon unsa ang iyang ginahisgotan. Miingon siya, “Ako—abi ko makagbakasyon una ako, apan—apan dili gusto sa Ginoo nga magkaaduna ako niini nga bakasyon. Kinahanglan ko nga makaabot didto, may tahas akong himoon. Nahunahuna ko nga mopahulay una og diyutay sa dili pa ako mopadayon, apan kinahanglan ko na nga moadto. Ang—dinalian ang mensahe, kinahanglan ko na nga makaabot didto.”

⁸² Akong mahunahuna, nga sa dihang natulon na si Jonas paingon sa tiyan niining inandam nga isda, mibiyo kining isdaa ug gibugahan og tubig ang tanang dapit, ug nagpadulong na sa Ninive sa ingon kapaspas nga mahimo niya. Gihatud sa Dios paingon didto kadto nga mensahe pinaagi nianang usa ka inandam nga isda. Ug nagpadulong kini sa Ninive sa ingon kapaspas nga mahimo niya, tungod kay kini—adunay mensahero nga nakasakay kaniya ug kinahanglan niya nga mahatud si Jonas didto. Nisakay man gud siya sa dili mao nga barko, apan nagtagana na ang Dios og usa pa ka kasakyan para kaniya.

⁸³ Busa, kabalo mo, sarang himoon sa Dios ang dagkung mga butang kon magpatalinghug lamang kita diha Kaniya. Kita n’yo? Siya—mohimo Siya—mohimo Siya og mga dalan kon diin walay dalan. Siya *mao* ang Dalan. Kita n’yo? Ug kung hingpit nga dinalian ang Mensahe, sama Niini sa karon, nagtagana ang Dios og usa ka paagi.

⁸⁴ Mahimatikdan nato pag-usab sa dihang si Amos. . . Naiwali ko na ang mahitungod sa niining tawo, si Amos. Kung gusto ninyong basahon ang maong sugilanon, maanindot kini, basaha ninyo ang sugilanon mahitungod ni Amos, ang unang kapitulo sa Amos. Usa pud siya ka tipo sa—sa mga pasidaan sa dili pa hampakon og paghukom ang kasal-anan. Karon, ang siyudad nga iyang pagapasidan—an, didto, usa kadto ka pundok sa mga Judio nga—nga silang tanan medyo misimang na sa matul-id nga dalan ug nahimo kining lugar nga usa ka dakung sentro sa

turismo. Ug—ug akong mahunahuna, maingon sa paghulagway ko niadtong buntaga, sa paghisgot bahin kaniya, nga, sa dihang miabot didto ang iyang upaw'ng ulo sa ibabaw sa bungtod ug nagsingkit ang iyang gamay'ng mga mata sa diha nga milantaw siya ug nakita ang kasal-anan sa niadtong inila nga nasud ug ang kasal-anan sa mga tawo, ang iyahang puti nga bungot usab samtang ginahaplos-haplos niya kini nga sama niana. Sus, daw sa unsa nga butang! Apan walay si bisan kinsa ang nanghibalo kon diin siya gikan.

⁸⁵ Walay si bisan kinsa ang nakaila niadtong mga propeta, basta na lang sila mangtungha gikan sa kung asa man ug mamuhat sa mao rang pamaagi.

⁸⁶ Apan miadto siya sa maong siyudad nga dala ang “MAO KINI ANG GINAINGON SA GINOO! Paghinulsol, o mangalaglag kamo! Kay pagalaglagon sa Dios ang kining nasud. Iyang—pagapapason Niya ang dapit ning yutaa. Nagapakigsabot kamo sa inyong kaaway. Ug kamo—nagkasabot na kamo, sa hunahuna ninyo, sa inyong kaaway, apan dugay na nga ang mga Asirianhon mga—mga nagsige'g palig-on sa ilang puwersa didto. Dili puedeng magkakuyog kamong duruha gawas nga kamo magakauyon. Kana lang.” Busa miingon siya . . .

⁸⁷ Ug gusto sa Dios nga ihimulag nato ang atong mga kaugalingon. Buot Niya kitang “manggawas gikan sa kalibutan,” dili nga maninguhang magkinabuhi uban sa kalibutan ug uban sa Dios usab, dili nga maninguhang manggawi uyon sa mga uso sa kalibutan ug sa Dios. Kinahanglan nga magkinabuhi kamo para lang sa Usa o sa laing usa, kinahanglan nagtoo lamang kamo sa Usa o sa laing usa.

⁸⁸ Ug karon atong nahibaloan nga, kining si Amos, tino niyang gitagna ang usa ka paghukom ngadto niining mga tawo gawas kon sila managhinulsol. (Ug—ug, sus, ingon—ingon niana gayud kini kahaum sa atong panahon.) Ginahunahuna ko kining dakung siyudad, sa diha nga ginabalikan ko kini, kining dakung siyudad nga atua didto, kon unsa nga nagapatuyang na kini, ug—ug usa ka dakung ekonomiya ang aduna sila sa tanang butang, mauswagan. Ug ang pagdahum nila nga anaa gayud sila diha sa kabubut-on sa Ginoo, tungod kay nagauswag man sila. Apan hingkaplagnan nila nga dili sa kanunay ang Dios mao ang tagmugna sa kauswagan. Dili, ang Dios . . . Usahay pagmoabot sa mga kaiglesihan ang kauswagan, nagapahilayo kini Kaniya.

⁸⁹ Kabalo ba mo, nagsulti ang Dios bahin sa Israel usa ka higayon kaniadto, miingon, “Hingkaplagnan Ko ikaw nga dugoan diha sa kapatagan, ug gihugasan Ko ikaw ug gisagop ikaw,” aron mamahimong Iyang Kaugalingon nga anak. “Ug dayon sa dihang midaku ka na, ug usa na ka maanyag nga dalaga, gibuhat mo ang papel sa usa ka bigaon.” Miingon Siya, “Imo—imo—imong basta-basta na lang ginatugyan ang imong kaugalingon

sa matag nagapangagi.” Kita n’yo? “Apan sa dihang kabus pa ikaw ug nanginahanglan, sa dihang—sa dihang aduna ka og panginahanglan, ginaalagaran mo Ako. Apan sa dihang Ako nagpanalangin kanimo ug nagahatag kanimo sa kadagaya, dayon mibiya ka na gikan Kanako.” Ug napamatud-an nga ingon-niana gayud kini. Oh, sus!

⁹⁰ Karon, nahibaloan nato nga gibadlong gayud sa niining propeta kadto nga nasud, kining si Amos. Usa lang siya ka magdadaro. Apan nahibaloan nato nga sa nahimo na niya, nga gibadlong ug giingon kanila kung unsa ang mahitabo, ug giingon kanila nga kung dili sila magpasig-uli ngadto sa Dios ang kaaway nga gikuha nilang kaabag nila mao ang mismong molaglag kanila.

⁹¹ Makita nato karon nga ang atong mapahitas-on nga Amerika dili gayud makahilingkawas sa kapungot sa Dios. Sama sa akong gisulti sa miaging adlaw sukad niadtong ania ako dinhi, sigurado ko nga dinhi kadto, bahin sa tanang butang sa katapusan. Kabalo mo, ako—wala na ako’y makita pa nga bisan unsa nga pagatukoran. Dili ka makatukod sa pulitika, wala na kini. Ikaw—dili ka mahimong motukod diha sa pangkatilingban nga pagkinabuhi, tungod kay ubos na kaayo ang moralidad niini. Didto—didto—wala na’y bisan unsa nga mahimo mong pagatukoran dinha. Ug wala ka na’y bisan unsa pa nga mabutangan sa mga paglaum.

“Unsa kaha kon sa iglesia?”

⁹² Bueno, wala ka na’y bisan unsa pang mahimo sa iglesia, pormal na kaayo kini ug wala na, wala na gayu’y nahibilin pa. Ila nang napamaligya ang ilang mga pagkapanganay baylo sa usa lang ka sinabawan, ug nagapaabot na lang sila og paghukom. Gilibot na sa Balaang Espiritu ang kining nasud, nga ginapakita ang Iyang mga ilhanan ug mga katingalahan, ug padayon nilang ginasalikway ang Iyang grasya. Ginapanghimatud-an Niya ang Iyang Kaugalingon ug nagapamatuud, pinaagi sa Iyang dakung kapanghimatuuran, nga Siya mao ang Pulong sa Dios nga nahipadayag sa niining panahon. Ug ginasalikway sa gihapon nila Kini. Kita n’yo? Wala na’y nahibilin karon. Dili nga basta-basta na lang ninyo buhaton kana ngadto sa Dios. Kita n’yo?

⁹³ Bueno, nahibaloan nato, nga una, Iyang ginapadala ang Iyahang mga propeta nga may dala og pagpasidaan. Wala Niya balhina ang Iyang pamaagi, ang pamaagi Niya sa paghimo og mga butang.

⁹⁴ Dili Siya kanunay’ng nagahampak sa dihang nagapasidaan Siya. Gusto kong hatagan ninyo og pagtagad ang kining kinutlo. Nagahatag ang Dios og pasidaan apan dili Siya kanunay’ng nagahampak sa mao rang higayon nga Siya nagapasidaan. Nahimatikdan ba ninyo kana? Ug dayon pag dili Siya mohampak sa diha nga nagpadala na Siya og pasidaan, kung ingon

niana mabugalbugalan ang propeta, “Wala man Kini gipadayag kanimo. Nagsulti ka lang og bakak. Ikaw—dili ka man husto.”

⁹⁵ Mahimong nasulti usab ang kanang mao gihapong butang ngadto—ngadto kang Isaias. Unsa ba sa hunahuna n’yo ang gihunahuna kaha sa mga tawo sa dihang miadto siya didto ug nagpropesiya nga ang hari “mamatay,” dayon mibalik didto ug miingon, “Dili, mabuhi gayud siya”?

⁹⁶ Unsa na lang si Jonas nga nagalakaw sa mga kadalanan kaniadto, nga nagaingon, “Oh, pagalaglagon na kining siyudad sulod sa pipila ka mga adlaw, kuwarenta ka adlaw,” ug dayon wala kadto buhata sa Dios?

⁹⁷ Kita n’yo, kinahanglan nga magbantay kamo, dili kanunay’ng nagahampak ang Dios sa dihang nagapasidaan Siya. Apan Siya . . . Aduna lang usa ka butang, kung ingon niana mabugalbugalan ang propeta. Apan kung siya usa ka gipanghimatud-an nga propeta nga aduna kaniya ang Pulong sa Ginoo, kita n’yo, mga ilhanan sa Dios, nga gipanghimatud-an, sama sa giingon na sa Dios pagapanghimatud-an ang maong propeta (nga mao kini nga mga tawo), kita n’yo, ang iyang Pulong dili iyaha, kondili sa Dios kini, ug mahitabo gayud kini. Kinahanglan nga mahitabo gayud kini kon Kini Pulong sa Dios. Aduna’y usa lang ka butang ang makapugong niini, kana mao ang paghinulsol dayon.

⁹⁸ Himatikdi, si Amos, siya—buhi pa siya nga makita ang iyang propesiya, apan sa diha nga naghisgot si Amos bahin niadtong siyudad, kon unsaon niini sa pagkahitabo, kon unsaon kadto sa pagbuhat sa Dios nga sudlon sa mga taga-Sirianhon ug sakopon sila, ug uban pa sama niana, ug kon unsaon sila sa paglamoy sa ilang kaugalingon nga kadautan. Aba, nagatoo ko kung karon kaha kini . . . Nagatan-aw ako dinhi sa Kasulatan, ug kung husto ang akong pag-ihap niini, anaa kini sa mga singkwenta na ka tuig human nga nagpropesiya si Amos. Ug, karon, unsa ma’y hunahuna ninyo? Usa ka tibuok nga kaliwatan ang milabay ayha nahitabo ang propesiya ni Amos. Apan kung inyong basahon dinhi, nagaingon kini kaninyo, ug nahitabo kini ingon ka eksakto gayud sa matag pulong nga gisulti niya. Kita n’yo?

⁹⁹ Nakita ni Juan ang Libro sa Pinadayag. Wala kini nahitabo sa iyang panahon. Apan makita nato kining nagakahitabo sa ingon ka eksakto gayud. Kita n’yo?

¹⁰⁰ Nagpropesiya si Daniel kaniadto bahin sa panahon, sa iyang panahon ug paingon hangtud sa katapusan. Wala na siya moabot nga buhi aron makita kini. Miingon Siya, “Padayon sa imong panaw, Daniel. Itago ang maong libro—ang libro, ug—ug isarado ang libro. Ug matulog ka diha sa imong bahin, apan magatindog ikaw sa niana nga adlaw.” Kita n’yo?

¹⁰¹ Karon, nakita n'yo, ang . . . sa kanunay . . . ang Dios . . . wala nagahampak nga Siya nagapropesiya pa lang. Ang propesiya ni Amos, sumala sa akong giingon, human pa sa singkwenta ka tuig, nahitabo kini. Apan nahitabo gayud kini!

¹⁰² Ug unya ang propeta mao'y usa—mao'y usa ka . . . sa Biblia . . . Ang usa ka tinuod, matuod nga propeta mao'y usa ka espesyal nga tawo. Dili “usa ka espesyal,” nga mahimong lahi kang bisan kinsa, kondili aduna siya og usa ka espesyal nga buluhaton. Kita n'yo? Ug, tungod sa maong espesyal nga sugo, kinahanglan siyang mahimong espesyal (medyo mahimong lahi sa uban) aron nga mabuhat kana.

Sama lang kini nga gipahisama sa Dios ang Iyang *mga propeta* ingon nga “usa ka agila.”

¹⁰³ Karon, ang agila usa ka espesyal nga langgam. Usa lang siya ka langgam, apan usa siya ka espesyal nga langgam. Ug mas habog ang mahimo niyang luparon kay sa ubang mga langgam. Mas halayo ang iyang makita kay sa ubang mga langgam. Ug, karon, aron nga makaadto siya sa pinakahabog, kinahanglan ingon niana pud ang iyang pagkadesinyo aron iyang malupad ang pinakahabog. Ug unsa mang kaayohan ang mahatag niini kaniya nga makaabot didto gawas lang nga makita niya kung unsa ang iyang gibuhat human siyang makaadto didto? Kita n'yo? Busa kinahanglan mamahimo siyang usa ka langgam nga espesyal ang pagkahimo. Kita n'yo? Daw usa siya—siya kamatang sa mga banog, siya “usa siya ka nagakuniskunis tungod sa iyang sungo.” Ug ginakaon niya ang . . . daghan kanila ang nagapangaon og dubok na nga patay. Adunay mga kuwarenta ka nagkalain-laing matang sa mga agila.

¹⁰⁴ Apan, nakita n'yo, sa iglesia adunay pastor, ug ang kanang pastor usa ka espesyal nga tawo. Gihimo siya kon diin mahimo niya—mahimo niyang pas-anon ang mga panagbingkil sa mga tawo. Siya—siya—usa siya ka tigpas-an og palas-anon, siya mao ang baka sa panon. Siya—usa siya ka tawo nga mahimong molingkod sa diha nga ang . . . pag ang usa ka tawo adunay batok sa laing usa pa, ug molingkod siya uban nianang duha ka pamilya (ug walay gidapigan) ug husayon kini ug ibalik kini pag-usab ngadto sa katam-is. Kita n'yo? Siya—usa siya ka pastor, nahibalo siya kon unsaon pagdala sa mga butang.

¹⁰⁵ Usa ka espesyal nga tawo ang ebanghelista. Usa siya ka tawo nga nagadilaab sama sa usa ka bola-nga-kalayo. Nagaadto siya sa usa ka siyudad ug ginawali ang iyang mensahe, dayon gikan didto mobalhin na pud siya sa ubang lugar. Kita n'yo, usa siya ka espesyal nga tawo.

¹⁰⁶ Usa ka espesyal nga tawo ang magtutudlo. Molingkod siya didto ilalum sa pagdihog sa Espiritu ug mahimo niyang kuhaon ang mga Pulong ug iplastar ang mga niini pinaagi sa Balaang

Espiritu, nga, ang pastor o ebanghelista, bisan asa kanila, dili arang ikagtandi diha kaniya.

¹⁰⁷ Ug unya, atong nahibaloon, nga usa ka espesyal nga tawo ang apostoles. Usa siya—usa siya ka “tigpahaluna-sa-kahusay.” Usa siya ka tawo nga pinadala gikan sa Dios aron ipahaluna sa kahusay ang mga butang.

¹⁰⁸ Usa ka espesyal nga tawo ang propeta. Ang propeta usa kini ka tawo kang kinsa nagaabot ang Pulong sa Ginoo, tungod kay ingon niana ang pagkadesinyo sa propeta (ang iyang kinabuhi) nga ang iyang ilalum-nga-panimuut ug ang iyang unang panimuut halos magkapareho na sa usa’g usa nga dili na niya kinahanglan pang matulog aron damgohon ang iyang damgo, makita niya kini sa dihang nagmata siya. Kita n’yo? Karon, kanang butang nga kinahanglan pagabuhaton sa Dios. Kita n’yo, makita niya kon unsa ang mahitabo pa lang.

¹⁰⁹ Halayo pa makita na sa usa ka propeta, kita n’yo, ang mga butang nga moabot pa lang. Makita niya ang copa sa kapungot sa Dios, nga napuno na, sa wala pa kini mapuno. Kita n’yo? Makaingon siya, “MAO KINI ANG GINAINGON SA GINOO! Ang Dios magalaglag sa niining siyudad gawas nga managhinulsol kamo.” Ngano man? Usa man siya ka agila. Nagalupad siya didto sa pinakahataas. Kita n’yo? Ug nagalantaw siya didto sa halayo ug makita niya nga gibubo na kadtong copa sa kapungot. Mga ingon niana ang ginalantaw sa propeta. Wala siya nagalantaw sa kon unsay nagapanghitabo dinhi, nagalantaw siya sa halayo! Nagaingon siya, “Nagasingabot na kini!” Mahimo niyang mopadulong sa pinakahataas hangtud nga makita niya kanang dag-um. Miingon siya, “Ang kalibutan magkangitngit—kangitngit ug hilabihan nga kangitngit.” Anaa siya sa ingon kataas, nga nagasidlak ang adlaw karon, apan nakita niya na kanang nagasingabot nga dag-um, ug iyang—iyang—iyang ginasulti kon unsa ang iyang makita. Wala pa kini dinhi, apan sigurado gayud nga moabot kini dinhi! Husto kana. Moabot gayud kini dinhi, ang hilabihan nga kangitngit nganha sa mga tawo. Nasayod siya nga nagasingabot na kini, mga tuig pa ang kadugayon, apan nakita niya kini.

¹¹⁰ Si Amos, ang dinihogan nga propeta sa Dios, nakita na niya ang—ang kangitngit ug ang paghukom. Nakita niya ang Siria nga nagasingabot na sakay sa ilang mga carro ug minglusob didto, gipangpatay kadto nga mga tawo. Nakita niya kadto nga nagasingabot na ug ang paghukom sa Dios ngadto kanila, karon, singkwenta ka tuig pa ayha kadto nahitabo. Apan, nakita n’yo, ingon nga usa ka propeta, giisa siya ngadto sa Espiritu ug nakita na niya kadto sa halayo. Kita n’yo? Nakita na niya ang copa, nga napuno na, sa wala pa kadto napuno.

¹¹¹ Sama ni Abraham. Gisultihan sa Dios si Abraham, “Magasulod sa niining nasud ang imong kaliwatan ug mamahimong mga dumuloong dinhi sulod sa upat ka gatus ka tuig, ug unya ipagawas Ko sila pinaagi sa usa ka kusgan nga kamot, tungod kay wala pa mapuno ang pagkadautan sa mga Amorehanon.” Kita n’yo? Nahibaloan na sa Dios nga mapuno ang kadtong copa. Nagpakigsulti Siya kaniadto sa Iyang propeta, gisultihan Niya siya karon, “Nakita mo kanang copa sa mga Amorehanon didto,” kita n’yo, “apan wala pa mapuno ang ilang pagkadautan, Abraham. Ayaw pagsulti og bisan unsa mahitungod niini karon, pugngi usà, apan moabot ra kini. Ug sa dihang mapuno na ang ilang copa, ug kining upat ka gatus ka tuig, Akong pagaabogon sila sama sa mga dulon sa imong atubangan, ug Akong pagalig-onon ang imong kaliwatan dinhi niining yutaa.” Amen! Ingon niana ang propeta sa Ginoo.

¹¹² Karon, sa dihang nagasulti siya bahin sa iyang panan-awon, kon kini kapungot man o kon kini pagkaayo man, mahimong malangay kini, apan kinahanglan nga mahitabo gayud kini kung ginapamulong niya kini sa Ngalan sa Ginoo. Kita n’yo? Mahimong usa kini ka panalangin ang iyang ginapamulong alang kanimo. Tingali may ginaingon siyang usa ka butang kanimo, ug dili mo man lang kini makita. Moingon ka, “Unsaon man pagkahitabo niini? Aba, usa kini ka . . . Ako—ako—ako . . . ginaingon Niya kanako, ‘MAO KINI ANG GINAINGON SA GINOO, “*Kini* ang magakahitabo, ug mahitabo gayud *kana*,” ug wala man gihapon kini mahitabo. Sayup kanang tawhana!” Karon pagahukman ka tungod sa dili mo pagtoo Niini, apan mahitabo kini sa gihapon! Kita n’yo? Mahitabo gayud kini!

¹¹³ “Bisan malangay kini,” miingon ang Biblia, “apan magapakigsulti gayud kini sa panahon niini.” Magakahitabo kini.

¹¹⁴ Nagalantaw lamang ang propeta sa halayo ug makita ang usa ka butang. Ginasulti niya kung unsay hingkit-an niya. Wala niya ginahunahuna ang mahitungod dinhi ug kon unsa ang hitsura mo karon, ginalantaw niya kon unsa ang mamahimong mamahitabo niini. Ug sa dihang nagasulti siya niana, kung anaa kini sa Pulong sa Ginoo, human na kini nga nasulti ug wala na gayu’y bisan unsa sa kalibutan ang makapugong niini (nakita n’yo, husto kana,) ang Dios lamang Mismo.

¹¹⁵ Himatikdi, karon nahibaloan nato nga sa dihang . . . Siya—nagahisgot siya sa iyang panan-awon, ginahimo kana sa propeta. Karon, usahay nagahisgot siya sa mga maayong butang, nagahisgot siya bahin sa imong pagkaayo. Bueno, tingali maghunahuna kamo, “Dili gayud kini mahimong mahitabo, wala pa man gihapon ko miarang-arang.” Nan unsa may ginabuhat niana? Ginadala lamang niana ang mga paghukom sa Dios nganha kanimo. Husto kana. Kita n’yo? Nagsaad si Jesus

nga luwason ka Niya kon motoo ka Niini; kung wala ka nagatoo Niini, dili kini—dili kini mahitabo diha kanimo. Kinahanglan mo nga dawaton Kini, kinahanglan nga motoo ka Niini. Kita n'yo? Ug kinahanglan hibaloon mo kon diin Kini nagagikan, ginahatag niana ang imong pagtoo sa Dios; o, sa imong propeta. Kita n'yo? Kinahanglan nga motoo ka Niini.

¹¹⁶ Ug karon nahibaloan nato dinhi, nga kining mga propeta nga nanagpanulti, sila—nanagpanulti sila ug nangahitabo gayud kon unsa ang gipangsulti nila. Ug kung ang kapungot sa Dios gibubo na ngadto sa mga tawo, aduna lamang og usa ka butang. . . Kung giingon niadtong maong propeta nga aduna pa'y kung unsa nga mamahitabo, aduna lamang og usa ka butang nga makapugong sa kamot sa Dios, kana mao ang paghinulsol. Kanang paghinulsol ngadto sa Dios, ang nagapapugong sa Iyang kapungot. Karon, ayaw na paghulat niini, buhata na dayon kini! Kon aduna ma'y ginaingon ang Dios og unsa man nga butang, buhata na dayon kini.

¹¹⁷ Si Ezechias, sa hingsayran niya dihadiha. . . Usa siya ka maayo nga tawo, apan miingon ang Dios, “Miabot na ang imong oras, Ezechias, ug Ako—kinahanglan Ko na ikaw nga pagakuhaon. Ako—gusto Ko, nga pagakuhaon Ko na ikaw. Husaya na ang tibuok mong balay.”

¹¹⁸ Ug siya—siya—miingon siya, “Magkinahanglan ako og kinse ka tuig aron sa pagbuhat niana, Ginoo.” Kita n'yo? “Karon, Ikaw ang. . . Ako—ako—nasayod ko nga motaliwan na ako, apan nagkinahanglan pa ako og kinse ka tuig aron nga mapahamutang sa kahusay ang akong balay. Dili ko kini mahimo nga karon dayon. Ako—wala na ko'y panahon sa pagbuhat niini. Ako—ako—dili ko gayud mahuman kini. Ginoo, tugotan Mo pa ako nga mabuhi og kinse ka tuig aron nga mamahimo ko kini nga butang. Dili ko mapahamutang ang akong balay. . .”

Kita n'yo, ang sugo sa Dios kaniadto, “Husaya ang imong balay!”

¹¹⁹ Ug miingon si Ezechias, “Dili ko kini mahimo niining tuiga, nagkinahanglan pa ako og panahon. Ibalik ko pa *kini*, ug tul-iron *kini* ug ihatud pa kini sa niining tawo dinhi, magkinahanglan ko niini og kinse ka tuig aron nga mabuhat kini. Lugwayan Mo pa ako aron lang nga mabuhat kini. Tugoti akong. . . tugoti akong. . . hatagi pa ako og diyutay'ng panahon aron nga mabuhat kini.” Kita n'yo?

¹²⁰ Unya miingon ang Dios, “Ako—Ako—Ako—magmaloloy-on Ako.” Apan bisan pa man kinahanglan niyang mamatay sa gihapon, nakita n'yo.

¹²¹ Ug dayon usab, gigamit niya ang iyang panahon, nag-backslide siya niadtong panahona. Kita n'yo? Ug mas maayo pa unta siya nga mitaliwan na lang siya nga wala na kadto

napahamutang sa kahusay. Husto kana. Apan gihatagan Niya siya og kinse pa ka tuig aron nga mapahamutang sa kahusay ang iyang panimalay. Tungod kay, sa madali, unsa may gibuhath niya? Miingon siya, “Ginoo, mahinay man ako. Nagkinahanglan pa gayud ako og kinse ka tuig aron sa pagbuhath niini. Gisugo Mo man ako nga ipahimutang sa kahusay ang akong panimalay. Dili ko kini mabuhath sulod sa kinse ka tuig tungod kay aduna ako’y utang dinhi, ug aduna ako og ingon *niini* dinhi, ug aduna ako og ingon *niini* nga pagabuhaton dinhi.”

¹²² Karon, usa siya ka diosnon nga tawo, ug kinahanglan nga mahitabo gayud ang Pulong sa Dios bisan pa man. Mahitabo gayud kini bisan pa man, apan Iya lang gipugngan Kini sa hamubong panahon, kita n’yo, gipugngan Kini alang kaniya. Unya nakabuhath siya og sala niadtong panahona. Miingon Siya, “Dili Ko kini ipaabot diha kaniya, apan Ako kining duawon nganha sa iyang mga kaanakan nga magasunod kaniya.” Nasayod na kamo sa maong estorya.

¹²³ Karon, nahibaloan nato nga ang usa ka gilayon nga paghinulsol nagapapugong kini usahay sa kapungot sa makadiyut.

¹²⁴ Karon, nahibaloan nato nga ang Ninive . . . miingon ang Dios, “Umadto ka didto ug magwali nianang siyudara karon, ug sultihan sila, ‘Kung . . .sulod sa kuwarenta ka adlaw magun-ob ang maong siyudad.’” Ug, sus, nanaghinulsol gayud sila! Sa diha nga ilang nakita kadtong maong propeta nga nagapadulong sa dalan, nga nagaingon, “MAO KINI ANG GINAINGON SA GINOO, ‘Magun-ob kining lugara sulod sa kuwarenta ka adlaw! Magun-ob ang kining lugar!’” Ang . . .

¹²⁵ Bisan gani ang hari nagsugo og usa—usa—usa ka pagpuasa sa tibuok nasud, sa pagbalata, “Managsul-ob kamo og bisti nga sako, magbutang og mga abo! Dili lamang sa inyong mga ulo mismo ug sa inyong lawas ug sa inyong unod, kondili sa inyong mga baka, sa inyong mga kahayopan sa uma, magbutang og mga abo ug bisti nga sako.” Grabe gayud nga mga paghinulsol!

¹²⁶ Karon, sa dihang nahibaloan nato didto, nahimatikdan nato, kung dili alisto nga magbantay ang propeta, kita n’yo, nga gamiton ang mga kaigmat niya ug modangop sa Dios, adunay butang nga imong makaplagn dinha mismo, kung dili ka magbantay . . .

¹²⁷ Karon tan-awa ninyo si Isaias, gisulti lamang niya ang iyang propesiya, mibalik dayon didto sa iyang gamay’ng payag sa kamingawan. Ug, sa dihang nahimo na niya, wala na nagpakigsulti og balik ang Ginoo ngadto sa hari nga nagaampo kaniadto. Aduna gayud Siya’y pamaagi sa paghimo og mga butang. Adunay usa ka propeta sa yuta. Nagaabot ang Pulong sa Ginoo ngadto sa Iyang propeta. Miadto Siya didto ug miingon, “Isaias, balik ngadto ug suginli siya nga nadungog Ko ang iyang

pag-ampo. Akong nasabot nga kini... nga sa hunahuna niya nagkinahanglan siya og kinse ka tuig aron nga mabuhat niya kini. Nakita Ko ang iyang mga luha tungod kay gusto gayud kaayo niya nga buhaton ang maong buluhaton. Nagkinahanglan siya og kinse ka tuig, ingon niya, aron mahimo kini. Lakaw ug sultihi siya nga ihatag Ko kini kaniya, kon ingon-niana.” Kita n’yo?

¹²⁸ Ngano man? Gisugo Niya—gisugo Niya si Isaias nga moadto og sultihan siya, “MAO KINI ANG GINAINGON SA GINOO!” Unya kung aduna man og bisan unsang kausaban niadto, o paglangay man... Mahitabo kini sa gihapon; siya—namatay man gihapon siya. Apan miingon... Kung aduna man og bisan unsa niadto, nan obligado Siyang ipabalik didto ang tawo nga gipasugoan Niya og MAO KINI ANG GINAINGON SA GINOO. Gisultihan Niya si Isaias, “Balik ngadto ug sultihi siya.”

¹²⁹ Karon, lahi ang taras nga gipakita ni Jonas, mitungas siya ngadto sa ibabaw sa bungtod ug miingon, “Bueno, maayo pa unta kon wala na lang ako natawo.” Ug, oh, daw sa unsa nga mipadayon siya! Ug nagpatubo ang Dios og usa ka gamay’ng tabayag ug gihimoan siya og usa ka landong hangtud nga nabugnawan siya didto. Apan miingon siya, “Karon, ania, mianhi na ko, ug moingon sila nga usa ako ka mini nga propeta.”

¹³⁰ Ug nagpakigsulti kaniya ang Dios, miingon, “Lantawa kanang siyudad didto! Lantawa didto, Jonas, nga ang tibuok siyudad nanaghinulsol na nga nanagbisti na og sako ug mga abo.”

¹³¹ Ug dayon Iyang gisulti kaniya ang mahitungod sa maong gamay’ng tabayag ug ang ulod nga mipatay niini. Usa ka adlaw, kon itugot sa Ginoo, gusto kong moanhi sa Taberbakulo ug magwali og usa ka serye bahin lamang kang Jonas. Oh, adunay daghan kaayong mga dagkung... kanang hangin sa sidlakan nga nagahuyop, ug tanan na. Oh, sus! Adunay daghan kaayong mga butang dinha, kini gayud... kulbahinam kini. Ang mga mahinungdanong butang nga anaa dinha, nagakatipo kining tanan mismo, nga sibo. Ginadala pa gani niini dinha si Jesus Cristo, ug tanan nang uban pa. Siyempre, ginadala man sa matag linya sa Biblia si Jesus Cristo. Oo, sir. Mao kana ang atong pang-Dominggong leksyon, busa mahibaloan nato kana, kon itugot sa Ginoo.

¹³² Ug himatikdi, adunay mga butang nga imong... Kung matinuuron ka ug imong sultihan ang Dios... Karon, kinahanglan nimong magbantay.

¹³³ Karon gusto kong ipakita kaninyo ang usa pa ka Jonas dinhi sa entablado karong gabhiona.

¹³⁴ Usa ka gabii adunay mga tawo nga mianhi dinhi. Tingali ang gining (ang uban sa ilang mga paryente) ania dinhi karong gabhiona, mao nga dili ko na pagasangpiton ang ngalan, tingali

og mahibaloan ninyo kon si kinsa kini. Apan nag-anhi sila dinhi, buutan kaayo nga grupo sa mga tawo nga taga-Kentucky, ug sila—nagaanhi sila dinhi sa daghan nang mga katuigan. Apan ang maong mga tawo, maayo kaayo nga mga tawo, mga suud ko nga higala. Sus, sila mga—sila mga tinuod gayud nga akong higala, apan sila . . . Usa ra sila sa kadtong klase sa mga tawo nga pag adunay rebaybal nga ginapahigayon manganhi sila sa simbahan; pag nahuman na ang rebaybal, ug bug-at ra ang palas-anon, wala na’y mangbira paanhi. Ug ania sa listahan sa mga bata ang tanan nilang mga anak, aduna sila og . . . sa dihang nagkaaduna kita kaniadto og mga pag-klase ug ingon-anang mga butang.

¹³⁵ Ug usa niana ka adlaw miuli ako sa balay, mga upat na ka tuig ang milabay, o lima, mga ingon-niana. Ug kining batang babaye, (nga mga walo pa ka tuig ang panuigon kaniadtong atua pa siya sa maong listahan sa mga bata), naminyo na siya ug nagkaaduna og duha ka anak. Ug nagahigda siya sa maong ospital dinhi, nga nag-ungaw na sa kamatayon. Mga upat na siya ka bulan, lima, nga nagmabdos; ug namatay ang maong bata, ug dili nila puedeng operahan tungod kay nagka-uremic man siya. Ug dili nila siya puedeng operahan, busa pasagdan na lang nga mamatay ang maong inahan, usab. Dili puede nga maoperahan, ug, kita n’yo, mahimong mamatay siya tungod sa bata nga ingon niana, busa gikinahanglan nila . . . naghimalatyon na siya, mao na kadto, wala na’y paglaum pa para kaniya.

¹³⁶ Miadto ko aron makita siya, gipatawag niya ako. Ug misulod ako ngadto sa ospital, ug atua siya didto sulod sa oxygen tent. Gipataas ko ang gamay’ng tabon, nagpakig-istorya kaniya og diyutay, ug miingon ko, “Mahinumduman mo pa ba ako?”

Miingon siya, “Siyempre, Igsoong Bill, mahinumduman ko pa ikaw.”

¹³⁷ Miingon ko, “Unsa man ang . . . Nasabtan mo ba kon unsa kagrabe ang imong sakit?”

Miingon siya, “Oo.” Miingon, “Mao nga gipatawag ta ka.”

Miingon ko, “Bueno, aba, kumusta man ang relasyon tali kanimong sa Ginoo?”

Miingon siya, “Igsoong Bill, ako—ako’y . . . ako—dili pa ako andam nga motaliwan.”

¹³⁸ Bueno, miluhod kami didto ug nag-ampo, ug ang iyang inahan ug ang iyang bana, daghan kanila ang atua sa kuwarto, ug misugod na sa paghilak ang iyang inahan ug ang bana. Ug—ug dayon akong—ako siyang gipangutana, ug nagpasig-uli na siya sa Dios (gituman ang iyang mga panaad ug mibalik ug nagsaad sa Dios; ug kung pasayloon siya; kon giunsa niya paghigugma Siya; ug nagsubo sa iyang mga kasal-anan, sa kon giunsa niyang pagkinabuhi kaniadto), ug nagpadayon sa iyang paghinulsol ug

paghilak. Ug pagkataud-taud mitindog na ako ug migawas sa maong bilding.

¹³⁹ Ug sa—sa sunod nga buntag gitawgan nila ako, aron pabalikon didto. Ug, nahibaloan ko na lang, nga miadto diay sila niadtong buntaga para sa usa ka pag-eksamin ug aron makita kon unsa na ka—ka grabe niadtong pagka-uremic niya, ug nahibaloan nila nga wala na gayud siya ug bisan diyutay pa niini. Nahanaw na kadto tanan, ang matag tipik sa maong hilong uremic wala na gayud kaniya. Nakurat kaayo ang mga doktor hangtud nga miingon sila, “Sus! Aba, kini, angay natong. . . Butang kini nga kahibulongan gayud.” Miingon, “Among—ipaandam na namo siya,” ug miingon, “kung ingon-ana gihapon kini inig-kabuntag. . .” Miingon, “Padayon na lang namo siyang hatagan og penicillin,” o kon unsa man ang ginahatag nila kaniya, aron masugpo ang mga impeksyon. Miingon, “Operahan na namo ug—ug tangtargon ang patay’ng bata sa dili pa kini mopadulong sa kung unsa pa.” Miingon, “Kung okey na siya, nan. . .”

¹⁴⁰ Bueno, duha o tulo ka higayon nila siya nga gi-eksamin pag-usab niadtong adlaw. Ug niadtong gabhiona, nga halawum na ang gabii, gi-eksamin nila siya, wala na’y problema, okey na gayud. Ug gipaandam na nila siya. Gipagawas na siya gikan sa maong oxygen tent. Okey na ang tanan. Ila nang operahan siya pagkasunod buntag, tangtargon na ang bata.

¹⁴¹ Bueno, nag-adto ako didto. Ug tungod kay nahitabo kadto. . . Karon, wala ako masayod niadto, wala gayud ako masayod. Walay bisan unsa man nga gisulti ang Ginoong kanako bahin niini. Mahimo ninyo nga pangutan-on ang mga tawo, kung gusto ninyo. Busa sila. . . siya. . . wala gayud Niya gisulti nga mamaingon kadto. Apan, oh, sus, nga makita ang ingon niana—ingon nianang butanga! Ang iyang bana, nga usa ka makasasala, miduol ug miingon, “Igsoong Branham, ako—gusto ko nga itugyan ang akong kinabuhi ngadto kang Ginoong Jesus.”

¹⁴² Ug miingon ko, “Sige, luhod ka lamang dinhi ug guniti ang kamot sa imong asawa, ug dayon magkakuyog nga pagalakwon ninyo kining matul-id nga pagkinabuhi.”

¹⁴³ Mibalik ang inahan, miingon siya, “Igsoong Branham, kabalo ka na, ania ako ug ang akong mga anak,” miingon, “kaming tanan dugay nang sulod-gawas, ug sulod-gawas, dinha sa Taberbakulo, ug ingon-niana. Manglingkod kami ug maminaw kanimo nga nagawali, ug mangduol kami sa altar ug mangbalik ra gihapon.” Miingon, “Backslider, usab ako, Igsoong Branham.” Miingon siya, “Gusto kong mahibalik kang Ginoong Jesus, tungod sa Iyang pagkamaayo sa akong anak.” Bueno, nakita n’yo, kana—maayo man kana, apan dili ka nagaduol ngadto kang Ginoong Jesus tungod niana.

¹⁴⁴ Mga tungang-gabii, alas-dose, ala-una, nakatagpilaw ang iyang inahan. Ug miingon siya, gitawag kini, miingon, “Mama.”

Ug miingon kini, “Oo, palangga, unsa may imong gusto?”

Miingon siya, “Kabalo ka, malipayon kaayo ako!”

Miingon kini, “Nalipay kaayo ko nga malipayon ka.”

Miingon, “Nagmalinawon na ako uban sa Dios.” Ug miingon kini, “Oh, pagkaanindot niana!”

Pagkataud-taud, nanawag siya pag-usab, miingon siya, “Mama.”

Miingon, “Unsa man?”

Miingon, “Mouli na ko.”

¹⁴⁵ Ug miingon kini, “Nasayod ko nga mouli na ka.” Miingon kini, “Oo, palangga,” miingon, “tangtangan na sa doktor ang maong bata ugma. Ug dayon mga usa ka adlaw o duha, pagmokipot na ang imong mga hiniwaan ug makabiya ka na dinhi, makauli ka na ug magmalipayon na pag-usab, ikaw ug ang imong bana ug ang gagmay’ng mga bata, ug nga mamahimong usa ka Cristohanon ug magkinabuhi alang sa Dios.”

Miingon siya, “Mama, ang buot kong ipasabot nga mouli na ko sa akong Langitnong Puy-anan.”

Miingon kini, “Oo, palangga, sa katapusan na niining panaw.”

Miingon siya, “Mao na man kini ang katapusan sa akong panaw.”

“Oh,” miingon kini, “nah, unsa may problema?”

¹⁴⁶ Miingon, “Katapusan na sa panaw.” Busa miingon, “Oo, mama, sa pipila na lang ka minutos motaliwan na ako.”

¹⁴⁷ Bueno, abi niya og ginerbyos ug nagsalimuang lang siya. Gitawag niya ang nars, gisusi sa nars ang iyang paginhawa. Normal man ang tanan. Ug sulod sa lima ka minutos mitaliwan na siya, namatay na siya.

¹⁴⁸ Ug dayon sa diha nga miuli na ako sa balay, sulod sa usa ka semana o duha human niadto. . . Sa hunahuna ko si Igsoong Graham ang nagwali sa lubong sa maong babaye. Sa pag-uli ko sa balay ug gisultihan ako ni Meda nga namatay na ang maong babaye niadtong gabhiona, sus, dili ko. . .

Ako—nag-adto ako aron makita ang inahan. “Oo.”

¹⁴⁹ Ug ako—ako—wala ko masayod kon unsay nagsugyot kanako nga buhaton kadto, apan miingon ako, “Ginoong Dios, Ikaw—kinahanglan Mong ipasabot kanako,” (Kita n’yo?) “human nga miadto ako didto ug—ug gisultihan kadtong bana, ug miduol siya ngadto sa Ginoo human nga gibuhat Mo kining mga butanga alang kaniya, ug ang tanan nang ingon niana, ug dayon kuhaon

ang kinabuhi sa maong babaye nga sama niana.” Miingon ko, “Kinahanglan Mong ipasabot kanako.”

¹⁵⁰ Pagsultihan mo ang Dios og ingon-anang butang, biyaan ka Niyang nag-inusara. Wala ako’y . . . Wala Siya’y bisan unsa man nga utang kanako. Ako ang utangang ngadto Kaniya. Bueno, gipasagdan lang Niya akong magmug-ot bahin niadto sa pipila ka mga adlaw, kabalo na mo. Ug, human sa mga tulo o upat ka bulan, usa niadto ka adlaw atua ako sa daplin sa sapa ug nagpakigsulti kanako ang Ginoo diha sa usa ka panan-awon, ug miingon, “Karon umadto ka sa iyang inahan, ug isulti kini ngadto sa iyang inahan, ‘Dili ba miabot naman unta ang iyang panahon usa ka tuig sa wala pa kadto, sa dihang nalumos siya didto sa usa ka sapa, sa usa ka pag-piknik? Mitaliwan na unta siya niadtong higayona, apan kinahanglan Kong kuhaon siya sa diha nga siya andam na nga mobiya.’ Ug kadto ang hinungdan mao nga nahitabo ang kining tanan ug kon nganong nag-adto ka didto.”

¹⁵¹ Dayon miluhod ako ug mihilak. Miingon ko, “Ginoong Jesus, pasayloa ako, ang Imong mahuyang og burong nga alagad. Wala ko gayud unta gisulti kadto, Ginoo.”

¹⁵² Ug mibalik ako didto sa maong babaye, nagpuyo siya dinhi sa Market Street, ug giadtoan ko siya, ug miingon ko, “Gusto ko nga mangutana kanimo.”

Miingon siya, “Oo, Igsoong Bill.”

Ug miingon ko, “Tinuod ba nga hapit na nalumos kining batang babaye?”

¹⁵³ Miingon siya, “Tinuod kana, Igsoong Branham.” Miingon, “Ang iyang bana ug sila—gikinahanglan nila siyang ihaw-as kaniadto gikan sa sapa.” Ug miingon, “Gikinahanglan pa nila kaniadto gamitan og artipisyal nga pagpaginhawa, ug pressure, ug nagkinahanglan sila niadto og usa ka aparato ug aron bombahon ang tubig pagawas gikan niya.” Miingon, “Nakapalda siya. Aduna sila og piknik kaniadto. Atua siya didto ug mitunob sa kung unsa nga bunbon, napakog ang ulo niya sa dihang nahidalin-as siya ug nalumos siya sa tubig. Wala gayud sila nakamatikod kaniya. Ug nakita na lang nila siyang milutaw-lutaw na lang, ug midagan sila ug gisakwat siya ug gihawas.” Ug miingon, “Hapit gayud siya namatay niadto.” Miingon, “Siya . . .”

Miingon ko, “Mao na kadto ang panahon nga motaliwan na siya.”

¹⁵⁴ Kita n’yo, nasayod ang Dios sa kon unsa ang Iyang ginabuhat. Karon, giingon na tingali kanako kadto sa Ginoo kung dili lang unta ingon niadto ang akong gipakitang taras, “Ginoo, may utang Ka sa ako, nga isulti kanako ang bahin niadto.” Wala Siya’y bisan unsa man nga utang kanimo!

155 Nagtindog ako didto sa usa ka panagtigum usa niadto ka gabii ug nadungog ang usa ka ebanghelista nga nagaampo alang sa usa ka tawong masakiton, miingon, “Dios, ginasugo ko Ikaw nga ayohon kini nga tawo!” Kinsa ka nga magasugo sa Dios? Kita n’yo? Kini—kini—dili kini—dili gani kini makatarunganon, kita n’yo, tungod kay ang Dios, Iyang—Iyang ginabuhat kon unsa man ang gustohon Niya.

156 Mahimo ba—mahimo bang ingnon sa lapok ang magkokolon, “Nganong gihimo mo man ako nga ingon niini?” Kita n’yo? Siguradong dili gayud! Apan kon magpabilin lang nga hilom ang propeta ug dayon pangitaon ang Ginoo alang sa tubag, kana ang tubag dinha. Kita n’yo?

157 Sama lang niining tawo nga nagapangutana bahin sa—sa—sa pangutana mahitungod sa binhi sa serpente, nakita n’yo. Basta—basta magbantay lang, ug ayaw—ayaw kamo—ayaw gayud pagdalidali. Ug dayon, karon, kanunay’ng ginapahitabo sa Dios ang tanang butang nga masigtabang alang sa ikaayo niadtong mga nahigugma sa Ginoo.

158 Karon, kung—kung wala gayud naghinulsol ang Ninive, nan miabot gayud unta kanila ang mga paghukom sa Dios. Karon hinumdumi, kinahanglan gayud nga magpatalinghug ang propeta. Usa kadto ka pasidaan.

159 Karon, mao ra kini sa gihapon sa niining nasud. Kung ingon—ana moingon kamo, “Igsoong Branham, giingon mo niadtong miaging Domingo nga ‘Wala na’y paglaum pa?’” Oo! “Ngano man?” Gisalikway niya ang pagtawag Niini. Kinahanglan nga madawat gayud niya kini. Madawat gayud niya kini. Moabot ang panahon nga mangadugmok ang kining nasud. Nakita ko na kini niadtong 1933. Kita n’yo, nakita ko nga halayo pa lang.

Miingon mo, tingali og miingon kamo, “Bueno, wala man kini nahitabo kaniadto.”

160 Apan mahitabo gayud kini! Ni wala pa sa kagahum kaniadto si Mussolini, ni wala pa natukod kaniadto ang Maginot Line, ni wala pa usab susama’ng tan—awon nga usa ka itlog ang sakyanan niadtong mga adlawa, ug ang mga butang, ni wala pa magpili ang mga kababayan—an kaniadto og usa ka Presidente nga ang hitsura sama lang sa usa—usa ka lalaki nga anaa pa sa kolehiyo, ug kining tanang uban pa nga mga butang, ni aduna man kaniadto og usa ka Katoliko nga Presidente, ug uban pa, nga ginapahanungdan kaniadto. Mga traynta na ka tuig ang milabay, o labaw pa, gipanagna na kini nga mga butang, apan gipakita lang Niya kanako sa halayo pa ang hangtud ngadto sa katapusan.

161 Ug samtang nga nagakahaduol na kana nga butang, sa oras—oras, nagakapuno kana nga copa! Ug ang paghinulsol naiwali na nila ni Billy Graham, Oral Roberts, ug ni kinsa pa. Ang mga propeta, ug uban pa, nalatas na ang nasud nga may dala

og mga ilhanan ug mga katingalahan, ug padayon gihapon siya nga nagapatuyang sa kasal-anan. Kana ang hinungdan kon nganong wala sila nanaghinulsol, ang paghinulsol mao ang nagahatud niini.

¹⁶² Himatikdi, wala gayud naghinulsol si Ahab sa pagbadlong ni Elias. Kung naghinulsol pa unta si Ahab ug naglakaw nga may pagpaubos sa atubangan sa Dios, wala unta mahitabo ang maong butang. Apan miadto si Ahab didto ug giangkong ang kaparrasan ni Naboth ug gipapatay kini, ug ang tanan na niining dautan nga mga butang. Ug si Jezabel . . . Naglakaw kadto nga propeta paingon didto nga may MAO KINI ANG GINAINGON SA GINOO! Apan unsa ang ilang gibuhahat? Direktang gibaharan ni Jezabel nga pagapatyon siya. Unsa may nahitabo? Natuman gayud ang iyang propesiya, gikaon sa mga iro ang maong babaye ug gitilapan ang dugo ni Ahab. Eksakto gayud sumala sa iyang pulong! Nakita niya ang copa, nga napuno na.

¹⁶³ Kana ang hinungdan nga ang kadtong gamay'ng si Micheas, nga ginaingon kaniadto ang mao rang butang, nga unsaon man niya pagpanalangin sa kung unsay gitunglo na sa Dios? Kita n'yo, ang iyang—ang iyang pulong, ang iyang propesiya, nahiuyon man diha sa Pulong.

¹⁶⁴ Si Herodes, wala gayud siya naghinulsol sa dihang miingon si Juan, “Dili uyon sa balaod alang kanimo nga angkonon kana, ang asawa sa imong igsoon!” Wala gayud siya naghinulsol. Apan unsa ma'y iyang gibuhahat? Gipangayo sa iyang asawa ang ulo sa maong propeta. Tan-awa ninyo ang kahugawan nga iyang gisudlan. Tan-awa kon unsay nahitabo kaniya. Tan-awa ninyo, bisan sa karon, didto sa Switzerland, ang—ang asul nga mga tubig didto tungod sa iyang pagsalikway Kaniya nagabulôbulô sa gihapon ingon nga usa—ingon nga usa ka pagdumdum. Kita n'yo, sigurado, wala gayud siya naghinulsol sa diha nga gibadlong siya sa Ginoo. Giingon ni Juan kaniya, nga bisan unsa pa siya kaniadto (usa man ka opisyal, o kon unsa man siya; o ang emperador man, o kung kinsa man siya), kinahanglan gayud niyang maghinulsol kung nagatawag ang Dios, kay kon dili mahiaguman niya ang kapungot!

¹⁶⁵ Pila ka higayon diha sa mga propeta . . . Aduna'y akong nasulat dinhi, apan wala na kita'y oras tungod aduna na lang ko og mga diyes minutos.

¹⁶⁶ Kung walay paghinulsol, nan sigurado gayud nga moabot ang paghukom! Naghinulsol si Ezechias. Kita n'yo? Naghinulsol ang Ninive.

¹⁶⁷ Wala gayud sukad naghinulsol si Ahab. Wala gayud sukad naghinulsol si Nabucodonosor. Wala gayud naghinulsol ang mga tawo kaniadto sa panahon ni Noe, ug mao nga mihaguros mismo ang paghukom kaniadto. Kita n'yo? Karon, apan ginapasidan-an una Niya ang tanan. Napasidan-an gayud ang tanan.

168 Karon, ingon nga makitang haduol na ang panahon, tugoti ang matag usa nga mibati og aduna gayuy pasidaan, maghinulsol sa gilayon sa dili pa mohampak ang kapungot sa Dios.

169 Dalhon nato kini karon sa Branham Tabernacle. Kita n'yo, nakita na nato kining mga butang ug hingsayran nga Kamatuoran ang mga niini. Nahibaloan nato nga Kini mao gayud ang bug-os nga Kamatuoran. Ang sugo sa Pulong mao ang, “Kung maghinulsol kamo ug magpabautismo sa Ngalan ni Jesus Cristo alang sa kapasayloan sa inyong mga sala, madawat ninyo ang gasa nga Espiritu Santo. Kay ang saad alang kaninyo ug sa inyong mga anak ug sa tanang atua sa halayo.” Kita n'yo?

170 Karon, usa ka lalaki, si Mr. Dauch, ang nangutana kanako dinhi dili pa lang dugay, miingon siya, “Igsoong Branham, nagakatigulang na ko. Nagakaluya na ko, nobenta'y-uno na.” Miingon siya, “Sa hunahuna mo—sa hunahuna mo ba nga ako—ako duol nang mamatay? Sa hunahuna mo ba hapit na kaha ako nga motaliwan? Sa hunahuna mo ba luwas na kaha ako?”

171 Miingon ko, “Mr. Dauch, miadto ka na ba sa usa—usa ka doktor alang sa usa ka pisikal nga pagpa-eksamin?”

Miingon siya, “Oo.”

172 “Ug ginaingnan mo siya . . . Karon, ang ginahimo sa doktor, aduna siya'y usa ka libro nga giluntod didto, ug kuhaon niya kini nga libro ug hibaloan niya. ‘Karon, ang unang butang nga angay kong buhaton sa nianang tawo, susihon ang iyang kasingkasing.’ Busa mokuha siya og usa ka stethoscope ug ibutang kadto sa iyang dalunggan, susihon ang kasingkasing niini.” Ug miingon ko, “Dayon, ang sunod niyang kuhaon, hibaloan niya ang presyon sa dugo niini, gamit ang usa ka—gamit ang usa ka pang-presyon sa iyang bukton. Dayon ang sunod niyang pagabuhaton, mokuha siya og ihi aron eksaminon, ug kung unsa pa, ug diyutay'ng dugo gikan kaniya, ug tanan na niining nagkalainlaing mga butang. Pagabuhaton niya kining tanan, ug kung wala siya'y makita nga bisan unsa . . . Pakuhaan og X-ray. Kung wala gayud siya'y makita nga bisan unsa, moingon siya, ‘Mr. Dauch, ikaw—himsog ka man.’

173 “Sa unsa man niya ginabasi kadto? Sa mga kondisyon gikan sa iyang pang-medisina nga libro, nga kung adunay bisan unsa man nga problema sumala sa ingon sa pangulong siyentista makita gayud dinha, *ingon niini* ang buhaton niini dinhi, *ingon niana* ang buhaton niini dinha. Busa, kutob sa iyang mahimong mahibaloan og bisan unsa mahitungod niini, okey ka, kita n'yo, sa pisikal.

174 “Karon,” ingon ko, “sa niini nga kahimtang, ako—hatagan ko kini og usa ka pag-eksamin sa kalag. Kita n'yo? Ug ang Dios, alang sa kalag, aduna lamang og usa ka Instrumento, husto kana, nga mao ang Iyang Pulong. Kana ang Iyang Pulong. Ug miingon si Jesus, diha sa San Juan 5:24, ‘Siya

nga nagapatalinghug sa Akong Pulong.’ Karon, kanang *pagpatalinghug* wala nagapasabot nga maminaw lang sa usa ka tingog. Kanang *pagpatalinghug* nagapasabot og ‘dawaton Kini.’ ‘Ang magadawat sa Akong Pulong,’ amen, ‘siya nga nagapatalinghug Niini!’ (Dili lang nga dili molihok, og tawgon Kini nga walay-pulos, ‘Kining mga butanga, wala ma’y pulos Kana. Wala ako nagatoo Niana.’) ‘Siya nga nagapatalinghug sa Akong Pulong!’ Uh-huh. Mao kana ang Pulong ni Jesus, nga, Siya mao ang Pulong. Tan-awa ninyo. ‘Kon mahimo ninyo nga magpatalinghug sa Akong Pulong,’ miingon Siya, ‘ug nagatoo Kaniya nga nagpadala Kanako, nakalabang na siya gikan sa kamatayon ngadto sa Kinabuhi; ug dili na gani pagahukman sa Silot, kondili nakalabang na gikan niini.’ Amen!” Miingon ko, “Kumusta man ang pagpitik sa imong kasingkasing karon?”

Miingon siya, “Nagatoo ako Niini. Nadungog ko Kini. Gidawat ko Kini.”

¹⁷⁵ Miingon ko, “Kung ingon-ana sumala sa Pangulong Espesyalista, sa Pangulong Tigdumala, nagaingon ang Pangulong Doktor sa Kinabuhing Walay Katapusan, ‘Nakalabang ka na gikan sa kamatayon ngadto sa Kinabuhi ug dili na pagahukman sa silot.’”

¹⁷⁶ Miingon, “Sa dihang nadungog ko ikaw nga nagwali sa Ngalan ni Jesus Cristo alang sa bautismo sa tubig, milakaw dayon ko nga nagsunod kanimo ug gibautismohan mo ako.” Miingon, “Ako... Ang tawo nga unsa ako kaniadto, dili na ako sama pa kaniadto. Adunay butang nga nahitabo kanako. Wala ako’y pagtagad kaniadto mahitungod Niini ug laing dalan ang ginalakwan ko kaniadto, apan miliko ako ug misugod sa pagbalik sa niining maong dalan. Ug nagadilaab ang akong kasingkasing adlaw ug gabii aron nga mas mahiduol pa ngadto Kaniya. Ang matag Pulong Niini, ginatoohan ko! Nagaingon ako, ‘Amen!’ sa matag tipik Niini. Dili ko igsapayan kon daw sa unsa nga masakitan ako Niini, ang gusto ko nga mohaum sa mismong sukod Niini. Ug mao man ako ingon sa nahibaloan ko.”

¹⁷⁷ Miingon ko, “Sa tan-aw ko daw sa maayo gayud ang pagpitik sa imong kasingkasing. Ako—nagatoo ako nga aduna ka na’y kasarang sa espirituhanon karon.”

¹⁷⁸ Miingon siya, “Naghunahuna ko kon aduna ba nga pagmoabot na ang Pagsakgaw, makauban kaha ako niini, Igsoong Branham?”

Miingon ko, “Dili ako ang makasulti kon kinsa ang makauban o kon kinsa ang dili.”

¹⁷⁹ Miingon siya, “Bueno, gusto ko pa nga mabuhi, gusto ko—gusto ko gayud nga makita ang maong Pagsakgaw.”

¹⁸⁰ Ingon ko, “Sige, tugoting tan-awon ko kon unsa ang—ang ginaingon sa Libro sa Siyensiya dinhi, bahin niini, ug sa siyensiya sa kalag dinhi.” Miingon ko, “Bueno, ingon

niini ang ginasulti Niini, diha sa Ikaduhang Mga Taga-Tesalonica, ang ikalima nga kapitulo, nag-ingon Kini, 'Kita nga mga buhi ug nga managpabilin hangtud sa Pag-abot sa Ginoo dili magauga' (buot ipasabot niana 'pugngan') 'kadlong mga nanagpahulay, nangatulog. Kay ang trumpeta sa Dios patingugon, ug kadlong mga nangatulog o nanagpahulay mao'y unang magapamangon, pagailisan og wala'y-kamatayon. Unya kita nga mga buhi nianang adlaw, nianang panahona human nga sila nagpamangon, kita n'yo, unya mangausab kita sa kalit lang, sa usa ka pagpamilok, ug magkigtambo uban kanila; ug unya moadto sa ibabaw aron sa pagsugat sa Ginoo diha sa kahanginan, magkauban nga pagasakgawon uban kanila.' Kon nagatulog ka man, o kon wala, kon nagalihok ka man o kon dili; bisan asa ka man gilubong, o kon wala man gani ka nalubong, makauban ka bisan pa man! Wala gayud og bisan unsa nga makapugong kanimo. Maatua ka gayud didto!" Miingon ko, "Igsoong Dauch, kon dili pa man moabot si Jesus hangtud sa kaapo-apo-apo-apo sa tuhod sa akong mga apo, maatua ka sa gihapon didto sa maong takna mismo, ug maatua ka didto sa dili pa sila mangausab, kung makauban man sila." Husto kana. Amen!

¹⁸¹ Adunay magaabot nga panalangin sama lang nga aduna usab og kapungot nga magaabot. Oh, nagahulat gayud kita alang sa usa sa mga niini karong gabhiona. Mahimong nagapaabot ka alang sa pagbubo sa kapungot diha kanimo ug sa kalaglagan, o nagapaabot kaha ka sa pagkabanhaw ni Ginoong Jesus. Ang mao ra nga Dios nga nagsaad sa usa, nagsa- . . . Malipayon ako kaayo!

Ginahulat ko ang pag-abot nianang malipayong adlaw sa Milenyum,
 Sa dihang moabot na ang atong mapanalanginong Ginoo ug ang nagahulat Niyang Pangasaw-onon pagasakgawon na;
 Oh! ang akong kasingkasing nangandoy ug nag-agulo alang nianang adlaw sa matam-is nga kagawasan,
 Sa dihang ang atong Jesus mobalik pag-usab sa yuta.

Dayon ang kasal-anan ug kasub-anan, kasakit ug kamatayon sa niining mangitngit nga kalibutan matapos na,
 Diha nianang mahimayaon nga paghari uban ni Jesus sa usa ka libo ka tuig nga pakigdait;
 (Oh, sus! "Ug makauban na ang Ginoo sa walay katapusan." Kita n'yo?)

¹⁸² Kung unsa man ang gisulti sa Dios, mahitabo gayud kini. "Magatukod sila og mga balay, magapuyo sila sa mga niini. Magatanum sila og mga kaparrasan ug managpangaon sila sa bunga sa mga niini. Sila dili magatanum ug lain ang

makapanunod niini. Magatanum sila og kaugalingon nila nga mga kaparrasan ug magpabilin diha niini.” Amen! Amen! “Dili sila mangdaut ni mangguba diha sa tibuok Ko nga mga Bukid nga balaan.” Alleluyah!

¹⁸³ Sa diha nga kining may kamatayon pagailisan na og walay-kamatayon, kini—pagalamoyon na sa kadaugan ang kining kamatayon, dayon makita na nato Siya ingon nga mao Siya ug magkaaduna kita og lawas sama sa Iyang Kaugalingong mahimayaon nga Lawas. Oh, pagkamaanindot nga panahong moabot!

¹⁸⁴ Ang mao ra nga Dios ug ang mao ra nga mga propeta nga nagproposiya sa Pulong sa Dios, o sa igabubo nga kapungot, igabubo, nagasulti usab bahin sa niining mga panalangan nga magapangabot. Malipayon kaayo ako! Dili gayud magapadala ang Dios ngadto sa usa—usa ka nasud og—og kalaglagan nga wala usa kaniini ginapasidan-an. Wala gayud Siya nagapadala og kalaglagan ngadto sa tawo nga wala kaniini gipasidan-an. Ug karon kung ginabuhay man Niya kana, adunay kung unsang butang nga nahitabo kanato, ang kapanghimatuuran sa mga ilhanan sa kaulahiang mga adlaw nganhi kanato, ang gamhanang Balaang Espiritu nga nagapanglihok sa atong taliwala ug ginadasig ang iglesia pinaagi sa Iyang Presensiya, nagapanghimatuod sa Iyang Pulong. Kung ingon-ana nagapangandam na ang Iglesia alang sa usa ka pagsaka ngadto sa kalangitan usa sa niining mga adlaw, pinaagi sa gahum sa Dios. Tungod kay usa man kaniini ka pasidaan nga isalikway ang matag kabug-aton ug ang sala nga nagapiit paglikos kanato, aron nga magalupad kita nga may pagpailub niining lumba nga gitanyang sa atubangan nato, paingon ngadto sa Magbubuhay ug Maghilingpit sa atong Pagtoo.

¹⁸⁵ Panalanganin kamo sa Dios, iglesia! Panggunit gayud ngadto sa wala-nagakausab nga kamot sa Dios! Oo, sir. Kung mabati ninyo ang Iyang Presensiya, dumuol kamo Kaniya. Kung aduna may bisan unsa nga sayup sa inyong kasingkasing, tul-ira na ninyo kaniini. Wala na kita’y daghang panahon nga nahabilin, haduol na ang Pag-abot sa Ginoo. Nagatoo ba kamo Kaniya? Oh, sus! Dili ba nga mamahimong maanindot kaayo didto? Daw sa unsa nga panahon, pagmakita ko na kadtong tigulang nga mga beterano nga nagalakaw didto nianang Paraiso! Oh, sus! Nagapaabot gayud ako alang nianang taknaa.

¹⁸⁶ Akong mahinumduman niadtong nadungog ko nga miingon ang igsoon kong lalaki, sa dihang nakabalik na gikan sa ubang nasud, gikan sa mga panggubatan kaniadto ug ingon-nianang mga butang, miingon, “Kadtong mga beterano kaniadto, sa diha nga mangabot sila nga makita na kanang Statue of Liberty, ug pangsakwatong silang mga bakol didto aron nga makita nila ang Statue of Liberty.” Una ninyo nga makita kana, diha sa barko, paghaduol na mo, tungod kay habog man kaayo kaniini. “Ug makita kanang kamot, nga gipataas didto,” miingon, “wala

gayud nakapugong ug nanghilak kadto nga mga lalaki. Ug basta kadtoong dagkung mga lalaki nanagtindog didto, nanagluhod didto mismo sa salog sa barko ug misugod sa paghilak.” Unsa man kadto? Usa ka ilhanan sa kagawasan. Ang tanan gayud nga ilang gimahal atua mismo didto luyo sa nianang maong ilhanan.

¹⁸⁷ Oh, apan unsa pa kaha pagmadungog ko na nga nagatingog ang karaang barko sa Sion nianang buntaga ug makita ko ang mga bandila nga nagakayabkayab! Pagmahuman na ang pakiggubat ug nakab-ot na ang kadaugan, alleluyah! Ug manguli na kita sa Panimalay, kon diin ang kamatayon, kasalanan ug impiyerno nabuntog na; ug wala na’y kasal-anan, wala na’y kamatayon, wala na’y kasub-anan. Madungog ko mismo ang pito nga nagatingog! Oh, nagakahaduol na gayud kita sa maong Siyudad. Oo, sir. Nagakaduol na ang mga balod, nagalihok na ang karaang barko paingon sa iyang puwesto. Dios, tabangi kami sa pagkinabuhi alang nianang taknaa!

¹⁸⁸ Ginoong Jesus, mga tawo kami nga—nga nagapaningkamot kutob sa among mahimo, gamit ang tanan nga ania kanamo, aron magalakaw diha sa Kahayag sa ebanghelyo sa Imong bantugan nga Maayong Balita nga Ikaw namatay aron mamahimong husto. Mapasalaman gayud kami nga makita, sa niining dautan nga mangitngit nga mga adlaw nga among gikapuy-an karon niining taknaa, nga makita namo nga nanagpanungha na ang mga ilhanan. Oh Dios, ingon nga mao na kini ang maong sinulat diha sa bongbong, nagapasalamat kami Kanimo, Ginoong, nga amo kining makita ug nahibaloan nga haduol na gayud ang katubsanan. Nagapangwali kami, ginalatas namo ang nasud, makita Ikaw namo nga nagapamuhat og dagkung mga ilhanan, ginapasundayag Mo ang Imong Kaugalingon adlaw-adlaw, matag tuig. Walay tuig nga nagapangagi nga wala nagaabot sa yuta ang Iyang (pagkadakung) Supernatural nga ilhanan. Ug makita namo kini, nga nahibalo nga padayon gayud nga nagamartsa ang halangdon nga kasundalohan sa Dios.

¹⁸⁹ Oh, dili daghan sa numero, apan pagkagamhanan kaayo nga panon nga adunay Kinabuhing Walay-Katapusan! Miingon, “Pagalatasan nila bisan ang panon sa kasundalohan ug ambakon ang pader.” Oo, ang “kasundalohan” sa kamatayon walay mga pangpugong niini, diretso Niya kining latason mismo. Ambakon ang “pader” tali sa natural ug Supernatural, ug paingon ngadto sa mga bukton sa Dios, ngadto nianang dakung Eternidad. Ginoong Dios, nagapasalamat kami Kanimo tungod niini. Nasayod kami nga nagakahaduol na ang panahon.

¹⁹⁰ Nagaampo ako, Dios, nga karong gabhiona kung aduna man og pipila dinhi nga wala pa makaila Kanimo, nga wala pa sila nagpasig-uli...Ug tingali karong gabhiona, samtang nagapakigsulti kami, usa ka gamay’ng Tingog ang nagapakigsulti diha sa ilang kasingkasing, “Nabati ko ang usa ka pasidaan nga dili na ko mahimong magdugay pa.” Oh

Dios, hinaut nga mapahamutang na nila sa kahusay ang ilang panimalay, karon mismo. Hinaut nga mahapsay na ang tanan. Hinaut nga ang pagkabugnaw . . . Tingali og mga Cristohanon sila, apan wala pa lang sila . . . Nagkinabuhi sila ilalum niini nga dugay-dugay na ug nakita na ang daghan kaayong mga butang, sila—nawad-an na lamang Kini og bili kanila. Kini . . . Kining mga butang, taphaw ang ilang pagdawat niini imbes nga tininuod gayud ug sinsero.

¹⁹¹ Oh Dios, tugoti nga managsusi kami karong gabhiona, itugot kini, ingon nga nahibalo nga ang kining mga dagkung butang mga pasidaan lamang kanamo mahitungod sa haduol na nga pagsakgaw sa Iglesia. Ug kon pas-an pas-an namo ang kasal-anan, ang pagkawalay-pagtoo, ug ang pagkatapulan, dili gayud kami makauban sa nianang Pagsakgaw. Nasayod kami niini, Ginoo, busa nagaampo kami nga Imong ipadilaab nganhi kanamo ang Espiritu Santo, ngadto sa kinasuloran sa among mga kasingkasing. Oh Dios, ipadilaab ang among mga kalag sa Imong panalangin. Tabangi kami nga makasabot.

¹⁹² Karon, panalangini og dungan ang mga tawo. Panalangini ang among bililhong pastor ug ang iyang asawa. Panalangini ang mga diyakono, ang mga tinugyanan, ang tanan nga mga nagasimba, ang tanan-tanan. Pasayloa kami sa among mga sala. Ayoha ang among mga sakit, Ginoo. Ug ipadilaab ang among mga kasingkasing. Ug hinaut nga manglakaw kami gikan niining dapita uban ang usa ka mensahe nga pasidaan, sa dihang mahinagbo namo ang mga tawo nga anaa diha sa kasal-anan, ug sultihan sila, “Higala, wala ka ba maulaw nga ginabuhat mo ang ingon nianang mga butang, ingon nga nahibalo na nga pagaatubangon mo gayud ang Dios sa umalabot nga adlaw?” Itugot kini, Ginoo. Ginatugyan ko sila diha Kanimo, karon; ginatugyan ang maong Mensahe, ug ang tanan na, aron masigtabang nga magapamuhat alang sa Imong kahimayaan. Sa Ngalan ni Jesus Cristo. Amen.

I love Him, I love Him,
Because He first loved me
And purchased my salvation
On Calvary's tree.

¹⁹³ Dili ba ninyo Siya ginahigugma? Hunahunaa ninyo kon unsa kita. Tan-awa kon unsa na kahalayo ang atong naabot nga dalan, mga higala. Lingia lang ang dalan gikan pa kaniadto, sa mga adlaw ni Luther ug ni Wesley, didto sa mga kapanahonan. Tan-awa ninyo dinhi kon hain na kita: ania na kita mismo ibabaw sa pyramid; dinhi mismo kon diin kini gipamatud-an sa Dios, nga ang Biblia pinaagi sa pito ka mga selyo hingpit na gayud nga napadayag; nagahulat na lamang karon sa nianang pito ka mga tinago diha mismo sa katapusan, bahin sa Pag-abot sa Ginoo ug sa Pagsakgaw sa Iglesia nga mahimong mahitabo gayud sa dili pa mobuntag. Oh, sus!

I love Him, (magmatinud-anon karon) I love
Him
Because He first loved me
And purchased my salvation
On Calvary's tree.

¹⁹⁴ Samtang mapahilumon kita karon... Nahunahunaan ba ninyo nga ang matag usa kanato dinhi gikinahanglan gayud nga mobiya dinhi, mobiya niini nga kalibutan? Nahibalo ba mo nga ang usa ka tawo nga natawo sa usa ka babaye hamubo ra sa panuigon ug tugob sa kasamok? Nahibalo ba mo nga tungod kay gipanganak kita gikan niadtong kahoy nga anaa sa Tanaman sa Eden, sa kamatayon, nga kinahanglan nga mamatay kita? Kita mao ang bunga sa tagoangkan sa atong inahan, ug kinahanglan natong mamatay, kinahanglan natong mopahimulag niini nga kinabuhi. Batan-on man o tigulang, walay kalainan niini. Kung ang pinakatigulang nga lalaki o babaye dinhi mabuhi pa pagkahuman niining tibuok gabii, mas malabwan pa sa kadugay sa maong babaye o sa maong lalaki ang daghan nga napulo-, mga bata nga kinse ka tuig ang panuigon? Gatusan kanila ang mangamatay sa tibuok kalibutan sa dili pa mobuntag, sa niining mga bata. Busa ang pinaka-importante gayud, mao'y, kung unsa ba ang ginabuhat ninyo karon mismo?

¹⁹⁵ Mahimong mao na kini ang imong ulahi nga kahigayonan. Batan-on o tigulang, mahimo mo nga mosimba. Ayaw gayud pagbiya nga dili mabuhat ang usa ka butang. Magkinasingkasing ug magmatinud-anon. Isalikway ang tanang sala ug ang tanan butang. Lantaw diretso sa nawong sa Dios ug ipangutana ang maong pangutana, "Ginoo, nakapahimuot ba ako Kanimo? Unsa pa ma'y mahimo kong buhaton, Ginoong Jesus? Dili na gayud ako magkaaduna pa og kahigayonan, human nga matapos na kini nga kinabuhi, aron sa pag-alagad Kanimo. Mao lamang kini ang panahon nga aduna ako. Ginoong Dios, pahibaloa lamang ako sa kon unsay gusto Nimong ipabuhat! Kon kinahanglan ko nga moadto ug buhaton ang *ingon niini* o kinahanglan ko nga buhaton ang *ingon niana*, malipay gayud ako nga buhaton kini."

¹⁹⁶ Ato ba—ginahunahuna ba nato kana nga ma'y pagkasinsero? Ginahunahuna ba kana sa gamay'ng mga bata? Ginahunahuna ba kana sa mga hamtong? Ginahunahuna ba kana sa mga tigulang? Ginahunahuna ba kana sa mga kabatan-onan? Siguradong motaliwan gayud kita, ug unsaon man ninyo sa pagpakahibalo nga kitang tanan dili pa motaliwan sa dili pa mobuntag? Wala kita mahibalo niini. Moingon mo, "Nagapabalaka kana kanako." Dili gayud angay! Sa tinuod lang, angay gani kamo nga magmalipayon kaayo nga mahibaloan nga mobiya na kamo niining karaan nga pesthouse.

¹⁹⁷ Adunay usa pa ka kalibutan. Dili na ninyo kinahanglan pa nga mopaingon sa halayo kaayo. Anaa kini mismo diha kaninyo.

Anaa kini diha sa inyong palibot mismo. Basta kamo . . . kamo . . . Gihatagan lamang kamo sa Dios og lima ka mga sensya, ug kana mao'y alang sa pagpakigkontak gayud niining, niini nga kalibutan. Apan adunay usa pa ka kalibutan nga wala kamo'y bisan unsa man nga mga sensya aron sa pagpakigkontak niini, dili kamo mahimong makapakig-kontak niini tungod kay wala man kamo niini.

¹⁹⁸ Pananglitan, miingon ako, niadtong Dominggo sa gabii, (tingali og wala ninyo nasabtan kini) sa kon unsa . . . aduna kita'y lima ka mga sensya: igtatan-aw, igtitilaw, igbabati, igsisimhot, igdudongog. Apan unsa kaha kon wala ka og igtatan-aw (aduna ka lamang og igtitilaw, igbabati, igsisimhot, ug igdudongog), ug adunay tawo nga nakadawat og igtatan-aw ug miingon, "Adunay usa pa ka kalibutan, ang adlaw"? Ang mga—ang kadtong mga igbabati, gakabangga ka sa mga butang, ug kon unsa man kini makasulti kanimo kon unsa kini. Aba, maghunahuna ka nga nabuang na ang maong tawo, tungod nga wala ka'y ingon niana—ingon nianang sensya sa—sa igtatan-aw. Wala gayu'y si bisan kinsa ang nagkaaduna niini, nga nahibaloan mo. May nadungog ka nga mga tawo nga misulti sa ingon nianang mga butang, apan imo kining giduhaduhaan. Apan nahibalo kita nga pinaagi niining sensya nga tinuod kini. Usa kini ka tinuod nga dapit. Kita n'yo? Kini—kini—kini—usa kini ka dapit kon diin nga . . . imong makita. Ginapahayag kana sa imong sensya.

¹⁹⁹ Karon, ang butang lamang nga imong pagabuhaton sa diha nga ikaw mamatay, ginausab mo lang kadtong lima ka mga sensya (Himaya! Whew!), magadawat ka og usa pa ka sensya. Ug buhi ka nga may usa ka mas hataas nga sensya, liboan ka pilo nga mas hataas pa kay sa niini, diha sa laing kinabuhi; usa ka kinabuhi kon diin wala na'y kamatayon, kon diin wala na'y kasubo. Ug ang mga butang nga wala nimo nahibaloan sa karon, imo na kining makita nga klaro pagmotabok ka na didto. Dili mo pa kini masabtan karon tungod kay ginabangga mo pa kini, wala ka pa og ingon niana nga sensya. Moingon ka, "Ako—mabati ko ang talagsaong pagbati dinhi karong gabhiona. Daw sa adunay usa ka . . . Gusto ko lang nga mohilak, o mosinggit, o kung unsa man." Kini mao ang mga Manolunda sa Ginoo. Kita n'yo?

²⁰⁰ Sama sa giingon sa usa ka tawo, kabalo na mo, nga wala pa nagkaaduna og sensya nga igtatan-aw, miingon, "Usahay mobati ako og usa ka butang nga tinuod, sama sa usa ka pagbati nga mora og init."

Moingon ka, "Kahayag kini sa adlaw."

²⁰¹ "Unsa man ang kahayag sa adlaw? Wala ko pa sukad nakita kini." "Wala man . . ." Kita n'yo, wala niya pa sukad nakita, wala gayud nahibalo kon unsa kini. Kita n'yo, kinahanglan pa nga

sultihan siya sa usa ka tawo dinha, usa ka tawo nga makakita niini. Oh, sus! Kita n'yo?

²⁰² Pagausabon lang kita. Pagausabon lang kita, ayaw kamo pagkahadlok sa kamatayon. Dili kabalak-an ang kamatayon kondili usa lamang kini ka panghadlok. Gibuntog na kini ni Jesus. Bisan kaniadtong miabot na si Pablo sa katapusan, miingon siya, “Kamatayon, hain na ang imong ikot? Hain na man ang imong panghadlok? Lubnganan, hain na ang imong kadaugan? Ang giingon mo nga nakuha mo na ako? Ako—gusto ko nga itudlo ka balik didto sa Jerusalem. Adunay usa ka lubnganan nga walay sulod didto ug ‘Ako mao Siya ang mibuntog kaninyong duha, kamatayon ug impiyerno,’ ug Ako anaa Kaniya ug dili ka gayud makapugong kanako! Mabanhaw gayud Ako.” Oh, sus! Miingon siya, “Adunay usa ka purongpurong nga gitagana alang kanako, nga ang Ginoo, ang matarung nga Maghuhukom, ang maghatag kanako; ug dili lamang kanako, kondili sa tanan usab nga *nahigugma* sa Iyang pagpadayag.”

²⁰³ Gihigugma ninyo Siya. Gusto ninyong makita ang Iyang pag-abot. Nagapaabot kamo Kaniya. Usa kini ka hataas nga estorya, usa kini—usa kini ka hataas nga pagpaabot. Usa kini ka relasyon sa paghigugmaay. Apan dili ka na makapaabot hangtud nga imo Siyang makita! Oh, sus! Ingon niana gayud kini. Oh, mao kana ang panahon nga atong ginapaabot, mao na gayud kana ang takna! Kung ang inyong kasingkasing dili sama—sama—sama niana karong gabhiona, higala, magbantay ka. Kita n'yo? Magbantay ka. Ayaw tugoti nga limbongan kamo sa kaaway. Kung Kining Balaang Espiritu nga ania dinhi gusto nang moadto sa Magbubuhat Niini, ngadto sa Agalon Niini, aduna gayud ug relasyon sa paghigugmaay nga walay bisan usa ang makasugid. Husto kana, tinuod kini. Tinuod kini.

²⁰⁴ Busa kung adunay pasidaan, nga nagaingon, “Dili ka pa andam para niana,” nan hinumdumi, mahimong ginapaandam ka sa Dios alang sa kung unsa. Kita n'yo? Dili ka pa andam . . .

²⁰⁵ Moingon kamo, “Buena, kung mabautismohan ako, sa Espiritu Santo, kon ingon niana, buena, tingali kuhaon na ako sa Ginoo?” Dili, dili lamang kana, nianang tungora nagasugod ka pa lang nga mabuhi. Ikaw—dili ka pa andam nga mabuhi hangtud nga madawat mo ang Espiritu Santo, ug dayon pagmadawat mo na ang Espiritu Santo nan takus ka na nga mabuhi. Dili ka pa takus nga mabuhi sa wala pa kana, kita n'yo, apan karon takus ka na nga mabuhi human nga madawat mo ang Espiritu Santo. Kita n'yo? Ginapaandam ka lamang. Kita n'yo?

²⁰⁶ Nagaingon ang mga tawo, “Buena, gikinahanglan ko gayud nga mangandam nga mamatay.” Oh, sus, nagapangandam na ako nga mabuhi! Amen. Ang punto niini mao ang, mangandam aron mabuhi, mabuhi kang Cristo! Madaugon nga kinabuhi batok sa

sala, kamatayon, impiyerno, anaa na kanako ang kadaugan. Siya mao ang akong Kadaugan ug ako mao ang Iyang ebidensya, ug ako mao ang ebidensya sa Iyang Kadaugan. Amen! Mao kana.

²⁰⁷ “Unsaon mo man pagkahibalo nga naangkon mo na Kini?” Basta naangkon ko na Kini. Amen. Gihatag Niya Kini kanako pinaagi sa Iyang grasya. Mabati ko Kini. Nasayod ako Niini. Nakita ko Kini nga nagapamuhat sa akong kinabuhi. Gibago ako Niini. Ug sumala sa niining Libro dinhi, miingon Siya nga ako adunay Kinabuhing Walay Katapusan ug dili na nga Pagahukman sa Silot, kondili nakalabang na ako gikan sa kamatayon ngadto sa Kinabuhi tungod kay Iya nang giako alang kanako ang paghukom nga para unta kanako. Ug kung Iya nang gibayaran ang maong bili, ayaw na tinguhaa nga dalhon ako sa bisan unsa man nga Paghukom. Gikuha na Niya kini para kanako, ug ako na kining gidawat. Oo, sir.

²⁰⁸ Busa wala na’y paghukom. Wala na’y—wala na’y kamatayon. Oh, kinahanglan kong biyaan ang iglesia ug biyaan ang mga tawo sa umalabot nga adlaw, apan kanang . . .kung magdugay pa si Jesus. Ug kung mahitabo man kana, aba, sus, dili ako patay. Dili ako mamahimong mamatay, aduna ako og Kinabuhing Walay Katapusan. Unsaon man nimo pagkamatay nga dala ang Kinabuhing Walay Katapusan? Kita n’yo? Kanunay’ng anaa sa Presensiya sa Dios ug sa kahangturan magauban Kaniya! Amen! Nagapadasig kana sa akong kasingkasing, sus, gusto ko na pud mosugod og wali pag-usab. Kita n’yo? Husto kana. Oh, Kahibulongan gayud Siya!

Isn’t He wonderful, wonderful, wonderful?
 Isn’t Jesus my Lord wonderful?
 Eyes have seen, ears have heard, what’s
 recorded in God’s Word;
 Isn’t Jesus my Lord wonderful?

Gusto ko gayud kana nga testimonyo.

Nakakita ang mga mata, *nakadungog* ang mga
 dalunggan, sa kon unsay nalista diha sa
 Pulong sa Dios;
 Dili ba kahibulongan si Jesus nga atong Ginoo?

²⁰⁹ Oh, gihigugma ko Siya! Siya mao ang akong Pakigdait, ang akong Kinabuhi, ang akong—akong Paglaum, ang akong Hari, ang akong Dios, ang akong Manluluwas, ang akong . . . (Oh, sus!) ang akong Amahan, ang akong Inahan, ang akong Igsoong Babaye, ang akong Igsoong Lalaki, ang akong Higala, ang akong tanan-tanan! Nakita n’yo? Among ginaawit kanhi ang usa ka hamubong kanta nga sama niana. Kabalo mo, nakakanta na ba mo nianang mga hamubong Pentecostal nga kanta nga sama sa . . . Nanghinaut ko nga gipalong na nila kanang rekorder, kita n’yo. Kanang kanta nga ginaawit nato kaniadto:

He's my father, my mother, my sister and my
brother,
He's everything to me.
He's everything, He's everything to me;
He's everything, He's everything to me;
For He's my Father, my mother, my sister and
my brother,
He's everything to me.

²¹⁰ Mahinumduman pa ba ninyo sa diha nga atong ginaawit kana kaniadto? Aduna pa ba kaninyo ang nakahinumdom niini? Sus, pipila na ka mga katuigan ang milabay! Ug dayon atong ginasulti kaniadto:

I know it was the Blood, I know it was the
Blood,
I know it was the Blood for me;
One day when I was lost, He died upon the
Cross,
And I know it was the Blood for me.

²¹¹ Mahinumduman pa ba ninyo kanang hamubo nga kanta? Tan-awon nato, unsa pa gani kadtong usa nga atong gikanta? Tan-awon nato.

Oh, won't you watch with me one hour,
While I go yonder, while I go yonder?
Oh, won't you watch with me one hour,
While I go yonder and pray?
I'm overcoming, I'm overcoming,
I'm overcoming, I'm overcoming;
For I love Jesus, He's my Saviour,
And He smiles and He loves me too.

²¹² Ang tigulang nga si Igsoong Smith kaniadto, usa ka itum nga igsoong lalaki, ania dinhi sa kanto kaniadto. Oh! Madungog ko gayud kadtong itum nga mga igsoon didto, molingkod lamang ko didto ug mosinggit ug mohilak ug uban pa, mauyog ko gayud ang akong sakyanan ug molukso-lukso nga sama niana. Ginapalampak nilang tanan ang ilang mga kamot. [Ginapalampak ni Igsoong Branham ang iyang mga kamot samtang nagakanta—Ed.].

Oh, won't you watch with . . .

Kadtong gamay'ng kumpas nga aduna ang atong itum nga mga igsoon, kabalo na mo. Walay si bisan kinsa ang makakanta nga sama kanila; mas maayo pa nga inyo na lang kining kalimtan. Kita n'yo?

. . . one hour,
While I go yonder, . . .

²¹³ Oh, sus! Nagalingkod ako didto, miingon ko, "Oh, Dios!" Kining gamay'ng batang lalaki, mga baynte ka tuig ang

panuigon, magdagandagan ako nga mituyok-tuyok niadtong sakyanan ug nga nagasiyagit ug nagadayeg sa Dios nga ingon niadto. Oh, pagkaanindot nga panahon! Bag-o pa lang kami adto misugod, sa dihang ang Dios nagapamuhat nga sama niana sa taliwala sa mga tawo. Miabot na kita karon ngadto sa punto ingon nga usa ka lig-on na nga Iglesia. Dili nga daghan og mga miyembro, kondili gamhanan gayud sa Espiritu. Amen. Pagkamaanindot kaayo!

²¹⁴ Dayon adunay usa ka hamubong awit kaniadto... Mahinumduman ko pa kadto nga adlaw didto sa Chattanooga, Tennessee, sa dihang nahimamat ko kining... Dili diay sa Chattanooga, didto kini sa Memphis, kon diin nahimamat ko kining gamay'ng itum nga babaye, kabalo na mo, nga nagatindog didto sa gawas. Nakadungog na kamo kanako nga nagaestorya bahin niini, kabalo na mo. Nagkaaduna ang iyang anak nga lalaki og mananakod nga sakit gumikan sa pakighilawas. Ug aduna siya niining sinina nga panglalaki nga gihigot sa iyang ulo, nagasandig sa lingkoranan nga ingon *niana*. Ug gipahunong sa Ginoo ang kadtong eroplano didto ug wala kini gipalarga, sa bisan unsang paagi, ug ila akong gisultihan nga mokuha... Ug miingon ang Balaang Espiritu, "Paglakaw lang usâ ug pag-adto *niini* nga dalan."

²¹⁵ Ug milakaw ako paadto didto, nga nagakanta. Hunahuna ko, "Sus, hapit na molarga ang akong eroplano!"

²¹⁶ Pabalik-balik nga nagaingon, "Paglakaw pa. Magpadayon ka pa. Magpadayon ka pa." Nauna nga bahin pa lang kadto sa akong ministerio.

²¹⁷ Ug ako mitan-aw, nakasandig sa pikas koral didto, ug usa ka gamay'ng balungbalong, sa gamay'ng luna didto. Dihay usa ka tiguwang igsoong babaye nga nagatindog didto. Oh, kadto siya... Mora'g kaanggid sa usa niining mga igsoong babayeng anaa sa Aunt Jemima pancakes. Lamorok sa tambok nga mga aping, kabalo na mo, ug ang iyang—iyang buhok, baliskad ang iyang sinina. Nagsandig siya sa pikas pultahan nga sama niana, ug ako lang... Ginakanta ko kadtong hamubo nga awit mahitungod sa... hamubong... Unsa gani ang... Akong nalimtan ang ulohan niadtong hamubo nga awit nga akong gikanta. Karon, butang kini mahitungod sa—mahitungod sa... Usa kini ka hamubong paspas nga Pentecostal nga kanta, usa ka diyutay'ng pagsadya.

²¹⁸ Ug mihunong na ako sa pagkanta, duol na kaayo ko niadto. Ug nag-agi ako. Ug nagatindog siya didto ug ang iyang mga luha nagatulo niadtong lamorok sa tambok nga mga aping; gusto ko siyang gakuson. Miingon siya, "Maayong buntag, parson!"

Miingon ko, "Auntie, unsa ba'y imong ingon?"

Miingon siya, "Ingon ko, 'Maayong buntag, parson.'"

219 Miingon ko, “Giunsa mo man sa pagpakahibalo nga usa ako ka parson?” Karon, sa mga tawo nga taga-Habagatan, nagapasabot kana nga “ministro,” kabalo na mo. Ingon ko, “Karon, giunsa mo man sa pagpakahibalo nga usa ako ka parson?”

Miingon siya, “Nasayod ko nga moabot ka.”

220 Miingon ko, “Nasayod ka nga moabot ako?” Sa hunahuna ko, “Uh-oh, ania na kini, kita n’yo.”

221 Miingon siya, “Oo, sir.” Miingon, “Nabasa—nabasa mo na ba kadtong estorya diha sa Biblia, parson, mahitungod niadtong Sunamitanhon nga babaye?”

Ingon ko, “Oo, auntie, nabasa ko.”

222 Miingon siya, “Medyo ingon niadto ako nga matang sa babaye.” Miingon siya, “Ug gipangamuyo ko sa Ginoo nga hatagan ako og usa ka bata, ako ug ang akong bana, ug padakuon ko kini alang Kaniya.” Miingon, “Gibuhat Niya, gihatag Niya kanako ang maong bata.” Ug miingon, “Gipadaku ko kini, nga buutan nga bata.” Miingon, “Nahiuban siya sa dautan nga grupo, parson. Nagkaaduna siya og grabe nga sakit,” ug miingon, “nagahigda siya didto nga naghimalatyon na. Mga duha na ka adlaw siyang naghimalatyon karon. Wala pa gani siya nagkapanimuot sulod sa duha na ka adlaw. Nag-anhi na dinhi ang kadtong lalaking doktor ug miingon, ‘Dili na siya mabuhi,’ miingon, ‘mamatay na siya.’ Usa kini ka sakit sa pangulag.” Ug miingon—miingon, “Dili na ako halos makahimo sa pagtan-aw nga mamatay ang akong anak, ug nag-ampo ako sa tibuok gabii.” Ug miingon, “Ingon ko, ‘Ginoo,’ miingon, ‘Ako mao ang matang sa babaye nga sama niadtong Sunamitanhong babaye, apan’ miingon, ‘hain na man ang Imong Eliseo?’”

223 Ug miingon, “Nahikatulog ako ug nagdamgo ako og usa ka damgo, nga nagtindog kono ako dinhi niining pultahan, ug nakita ko ikaw nga nagalakaw sa dalan nga may ingon nianang gamay’ng kalo nga medyo pinatakilid diha sa imong ulo.” Apan miingon, “Adunay usa lang ka butang,” miingon, “asa man kadtong. . .” Miingon, “Aduna ka man unta’y dala nga maleta sa imong kamot.”

Miingon ko, “Gibilin ko lang kadto didto sa Peabody Hotel.”

224 Miingon, “Nasayod ko nga aduna ka unta’y dala nga maleta.” Ug miingon siya, “Naghimalatyon na ang akong anak.”

Miingon ko, “Branham ang akong ngalan.”

Miingon siya, “Gikalipay ko nga mahimamat ka, Parson Branham.”

225 Miingon ko, “Nagaampo ako alang sa mga masakiton. Nadungog mo na ba ang mahitungod sa akong ministerio?”

226 Miingon, “Wala, sa hunahuna ko wala pa ako sukad nakadungog.” Miingon, “Puede ka bang mosulod?” Ug misulod ako.

227 Nagahigda nga ingon niana ang kadtong daku nga batan-on didto. Gipaningkamotan kong isulti sa maong babaye ang mahitungod sa Langitnong pagpang-ayo, apan dili siya interesado niadto. Gusto niyang madungog sa kadtong batang lalaki nga moingon kini nga “luwas na ug andam na nga motaliwan.” Ug miingon siya . . . Ug giluwat sa Dios ang maong batang lalaki.

228 Ug mga usa na ka tuig ang milabay nakita ko siya didto nga usa na ka kargador didto sa estasyon. Daw sa unsa nga nagapamuhat gayud ang Ginoo sa mga butang!

229 Ug dayon sa dihang mibalik ako, human niadto, ako unta . . . kinahanglan unta alas-siete ang larga niadtong eroplano, ug mga tunga na sa oras kaniadto nga milabay ang alas-nuebe. Ug nag-taxi na ako ug mibalik. Ug sa pagsulod ko mismo, miingon, “Katapusang tawag na para sa biyahe nga numero *ingon niini-ug-ingon niana*.” Gipugngan gayud sa Ginoo kadto nga eroplano didto sa yuta samtang miadto ako ug nag-ampo alang niadtong batan-ong lalaki. Kita n’yo? Mao kana.

230 Gipaningkamotan kong dumdumon kanang, usa ka hamubong kanta, “*One Of Them*.” Mao kana. Oh, kon giunsa nga ginahimo nato kaniadto ang kadtong paglingin dinhi, ug ginapalapak ang atong mga kamot. Nagaingon kita:

One of them, one of them,
I’m so glad that I can say I’m one of them;
(Alleluyah!)

One of them, I’m one of them,
I’m so glad that I can say I’m one of them.

They were gathered in the upper room,
All praying in His Name,
They were baptized with the Holy Ghost, And
power for service came;
Now what He did for them that day
He’ll do for you the same,
I’m so glad that I can say I’m one of them.

One of them, one of them,
I’m so glad that I can say I’m one of them;
One of them, I’m one of them,
I’m so glad that I can say I’m one of them.
(Kamo pud ba?)

231 Paminawa ninyo ang kining berso.

Though these people may not learn to be,
 Or boast of worldly fame,
 They have all received their Pentecost,
 Baptized in Jesus' Name;
 And they're telling now, both far and wide,
 His power is just the same,
 And I'm so glad that I can say I'm one of them.

Oh, one of them, I'm one of them,
 I'm so glad that I can say I'm one of them;
 One of them, oh, I'm one of them,
 I'm so glad that I can say I'm one of them.

Oh, come, my brother, seek this blessing
 That will cleanse your heart from sin,
 It will start the joy-bells ringing
 And will keep your soul on flame;
 Oh, it's burning now down in my heart,
 Oh, glory to His Name,
 And I'm so glad that I can say I'm one of them.
 (Gikalipay n'yo ba kana?)

One of them, one of them,
 I'm so glad that I can say I'm one of them;
 Oh, one of them, one of them,
 I'm so glad that I can say I'm one of them.

²³² Oh, wala ba mo malipay? Magpakiglamano na kita sa usa'g
 usa sa dihang kantahon nato kini. Unsay inyong maingon?
 Buhaton nato kini.

One of them, one of them,
 I'm so glad that I can say I'm one of them;

Nalipay usab kaayo ako, igsoon.

Oh, one of them, one of them,
 I'm so glad that I can say I'm one of them.

Oh, come, my brother, seek this blessing
 That will . . . soul aflame,
 That will start the joy-bells ringing
 And will keep your soul on flame;
 Oh, it's burning now within my heart,
 Oh, glory to His . . .

Ipataas nato ang atong mga kamot.

Glad that I can say I'm one of them.

²³³ Ang tanan.

One of them, one of them,
 I'm so glad that I can say I'm one of them;
 I'm one of them, one of them,
 I'm so glad that I can say I'm one of them.

²³⁴ Paminaw'g maayo pag-usab karon, kita n'yo.

Though these people may—may not learn to be,
 (wala sila nakag-kolehiyo)
 Or boast of worldly fame,
 They have all received their Pentecostal
 Blessing,
 Baptized in Jesus' Name;
 And they're telling now, both far and wide, (sa
 matag gamay'ng suok ug kanto)
 His power is yet the same,
 I'm so glad that I can say I'm one of them.

235 Oh, kantaha ninyo kini, iglesia!

. . . them, one of them,
 I'm so glad that I can say I'm one of them;
 Oh, one of them, one of them,
 I'm so glad that I can say I'm one of . . .

236 Kuhaa ninyo ang inyong gamay'ng panyo karon.

One of them, one of them,
 I'm so glad that I can say I'm one of them;
 Oh, one of them, one of them,
 And I'm so glad that I can say I'm one of them.

237 Dalaygon ang Ginoo! Amen! Sama lang kita sa mga bata.
 Walay bisan unsa man nga pagkapormal kanato. Walay porma
 ang Dios. Husto ba kana? Oo, sir!

I'm one of them, one of them,
 I'm so glad that I can say I'm one of them;
 I'm one of them, one of them,
 Oh, I'm so glad that I can say I'm one of . . .

238 Malipayon ba kamo nga masulti ninyo kini? Ipataas lang
 ang inyong kamot, moingon, "Dalaygon ang Ginoo!" [Nagaingon
 ang kongregasyon, "Dalaygon ang Ginoo!"—Ed.] Dalaygon ang
 Ginoo! Nalipay ako nga usa ako diha kanila! Malipayon ko nga
 mahimong ingon niana.

239 Ginoong Dios, malipayon kaayo ko. Ingon nga usa kanila!
 Ingon nga usa kanila! Nalipay kaayo ko nga makasulti nga usa
 ako diha kanila. Oh Dios, tabangi kami nga mahimong ingon
 niana. Tabangi kami nga maipadayon nga nagahayag ang mga
 Suga, Ginoo, samtang nagamartsa kami padulong sa Sion. Itugot
 kini, Amahan. Sa Ngalan ni Jesus, ginahalad namo ang among
 mga kinabuhi diha Kanimo alang sa panerbisyo. Amen. Amen.

Oh, we're marching to Zion,
 Oh, beautiful, beautiful Zion;
 We're marching upward to Zion,
 That beautiful city of God.

Come, we that love the Lord,
 And let our joys be known,
 Join in the song with sweet accord,
 Join in the song with sweet accord,
 And thus surround the throne
 And . . . (Oh, manganta lang diha sa
 Espiritu!) . . . the throne.

Oh, we're marching to Zion,
 That beautiful, beautiful Zion;
 We're marching upward to Zion,
 That beautiful city of God.

Oh, we're marching to Zion,
 Beautiful, beautiful Zion;
 We're marching upward to Zion,
 That beautiful city of God.

Let those refuse to sing
 Who never knew our God;
 But children of the heavenly King,
 But children of the heavenly King,
 May speak their joys abroad,
 May speak their joys abroad.

240 Kantahon nato kini!

We're marching to Zion,
 Oh, beautiful, beautiful Zion;
 We're marching upward to Zion,
 That beautiful city of God.

241 Oh, dili ba gihinloan na kamo og ayo niana? Dili ba gusto man ninyo kanang karaan nga mga kanta? Ako—mas gustohon ko pa ang mga niini kay sa tanan nga mahimo ninyong . . . o ang bisan unsa man sa niining uban pa nga matang sa mga kanta nga aduna kamo. Maayo gayud ang mga niining, karaan nga kinasingkasing nga mga kanta. Oh, sus! Maayo kaayo ang akong gibati ug malipayon sa dihang ginakanta ko ang mga niini, maayo gayud! Sus, gibati ko gayud ang kalipay!

Take the Name of Jesus with you,
 Child of sorrow and of woe;
 It will joy and comfort give you,
 Oh, take it, everywhere you go.

Precious Name (precious Name!), O how sweet!
 (O how sweet!)
 Hope of earth and joy of Heaven;
 Precious Name, O how sweet!
 Hope of earth and joy of Heaven.

242 Samtang ginaduko nato ang atong mga ulo karon:

At the Name of Jesus bowing,
Falling prostrate at His feet,
King of kings in Heaven we'll crown Him,
When our journey is complete.

Precious Name, O how sweet!
Hope of earth and . . .

[Ginatapos na ni Igsoong Neville ang panerbisyo—Ed.]



WALA GINAHUKMAN SA DIOS ANG TAWO
NGA DILI UNA SIYA GINAPASIDAN-AN CEB63-0724
(God Doesn't Call Man To Judgment Without First Warning Him)

Kining Mensahe ni Igsoong William Marrion Branham, una giwali sa Ingles niadtong Miyerkoles sa gabii, Hulyo 24, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2017 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org